

## Apocalipsis

### San Juanne An Pinkih Para

Patmos pi paizka sukin uztuasmin (1.9), San Juanne sun Apocalipsis pinkih para, Diosta piantuz an tinta namanapa, Cristora nijkultuza tailchaanapa, uspa kwisha naizamtu akwa. Diosne paiña kwaltuza chiwazha minpa payura kinazi piankamninnamtu, uspa naizamtu aizpa ishkuamanpa, Cristora chihkamanpa. Sun payura Diosta piantuz naizarakas, Juanne minpa payura Dioskas Anpat Jesúskas wan kwailtuza anuppanazi tinta kainanara. Juan kainkizparawane, usne us izta aizpa pinkihta para, wan awa chiwazha minpa payura kimtu aizpa piankamanapa.

Juanne Jesucristowa awaruza kaiznanamtu, sun pit Diostas amtu piankamanapa (1.1-8). Diosne Juanta kainkizpanintu, watsal Cristora iznapa, paiña pit siete iglesiaruza paninnapa (1.9-3.22). Kwiztane Diosne chiyura azpiannintu, Juan siete iptit pinkih iznapa (6.1-8.1). Kwiztane Juan siete iru kwil iztu. Suasne mazane kutña piji “une naizanazi” kiznazi (8.2-14.20). Kainkizpamtuaasmin, Juanne siete tazakas iztu (15.1-16.21). Suasne Juan kainkizpamtuaasmin, Diosne wan kwailtuza an sukin naizninnamtu, Diablora anuppanakima (17.1-21.15). Minpa Diosne masas Jerusalén pipulu samtu (21.1-22.15). Usne ka kwiantu: “¡Anpat Jesús, apa anka!”

*Diosne awaruza Jesúspa piankamninnantu*

<sup>1</sup> Diosne an pit Jesúspa paranintit, paiña kiwain-tuz mamin kirímtu aizpa piankamanapa. Nane Juan mun ish. Diosne paiña ángel nawa ̄intinta, Diosta nijkulturuz an pit piankamanapa. <sup>2</sup> Nane watcha na izta aizpa p̄inkihta parau. Dios pitkas Jesucristo kaizta aizpakas p̄inkihta parau.

<sup>3</sup> Diospa pit p̄inkih iztumikane, Dios kaizta aizpa mishimtumikane, an pit parit aizpa kishimtu-mikane, watsal kulnazi. Sun watsal payu taizna-pain i.

*Juanne siete iglesiaruza panantu*

<sup>4</sup> Nane Juan mun ish. Nane, uruza, siete iglesiaruza Asia sukin uzturuza panamtus. Diosne uruza kiwainashimtu, kalpain uzanapa. Usne ñamin uzta. Makas uztu. Kwiztakas uznazi. Diospa S̄inam Izpulne siete impilkanain aiz kit uruza kiwainashimtu, wat uzanapa.

<sup>5</sup> Jesucristokas uruza wat kainashimtu. Usne an ñancha irittas kuhsaktamika azi. Mamasa imanazi. Usne wan au sukin ̄intuzkin an tinta i. Cristone aumiza pashinat kit au kwail akwa irit. Cristo au akwa irit akwa, paiña aimpi akwa, usne au kwail kiarit aizpa s̄inam sanat kit aumiza chihtnara, kwail kiamanpa. <sup>6</sup> Usne aumiza wanmakninnara, uskasa ̄ininnanapa. Usne aumiza pariya namninnara, paiña Taitta Diosta kiwain kit paikuana. Awane Diosta “us kwisha wari” kizarawa. Usne an surakas wan awaruzakas pailta payurakima ̄ininnashina. Sunkana kirinazi.

<sup>7</sup> Cristone wanishkasa anazi.

Wan ussa nijkultuchiruzne ussa izanazi.

Ussa piantarittuzkas

wan suras awaruzkas uspa kwail kiarit akwa,  
us akwa ishkuat kit tinta azanazi.

Sunkana kirinazi.

<sup>8</sup> Anpat Diosne, wan kishitmikane, nawa ka  
kaizta: “Nane ñamin uztau. Minpa payukima uz-  
nash. Nane ñamin uztau. Makas uztus. Kwiztakas  
kailnash,” kizta.

### *Juanne kainkizparakanain Cristora izta*

<sup>9</sup> Nane Juan mun ish. Nane uwa  
aimpihshkanain ish. Au Jesústa nijkulamtu  
akwa, aune naiztumakpas, Dios wanta  
anuppanakima. Jesús aumiza kiwainantu  
akwa, wan naizmu tailchashimtumakpas.  
Dios pit parit aizpa kainarawane, Jesús kaizta  
aizpa kainarawane, awane nawa Patmos sura  
ianinta, sipninnapa. Sun sune pi paizkakin  
uzta. <sup>10</sup> Diospa Izpulne Domingo payura nawa  
piz kit kainkizparakanain izninta. Nane ap  
punsihman tinta paramtumikasha mīrau. Usne  
tinta parat, iru kwil ustukanain. <sup>11</sup> Usne nawa  
ka kaizta: “Nu kainkizpamtu aizpa pinkihta  
parawa. Pinkihta parawane, sun pinkihta  
nijkulturuza Asia sukin uzturuza ininnari. Sun  
pinkihta Efeso pipulurakas, Esmirna pipulurakas,  
Pérgamo pipulurakas, Tiatira pipulurakas, Sardis  
pipulurakas, Filadelfia pipulurakas, Laodicea  
pipulurakas ininnari.”

<sup>12</sup> Nane ap punsihman izpujiarau,  
paramtamikasha izna. Puij izkane, nane siete  
uru impil put panatkana iztau. <sup>13</sup> Siete impil uru  
panat paizkakin nane Cristora, maza awakanain  
iztau. Paiña pīnne aks mittirakima kwarit. Usne

paiña pechokin uru tit iptit. <sup>14</sup> Paiña ashne putchā pimpuhkanainkas putchā wanishkanainkas iztit. Paiña kasune īn aiztukanain iztit. <sup>15</sup> Paiña mittine iru aiztitkana iztit. Paramtuasmin, usne paiña pitpara tinta kwianta, katsa pi aztukanain. <sup>16</sup> Usne paiña numal chihtikasa siete kīma pizza. Pa matsih tiz mashtine paiña pittas puzta. Paiña matsihne pān tinta maltukanain kwisha watsal aizta.

<sup>17</sup> Ussa iztawane, nane irītkanain paiña mittikin wakpuj waintau. Sunkana usne paiña numal chihtikasa nawa pat kit kaizish: “Ishkumun. Wan sarachasmin, nane an ñancha uzttau. Minpa payurakima uznash. <sup>18</sup> Makas uzmika ish. Pailmanash. Na irītkanain tuatkas, mane pailta payukima ka uzish. Awa irīka, nane awaruza iarīnpa īninnamtus. Nane Dios nijkultuchiruza, irīt izpultuza, īnta īninnat kit sua watsarit mijish, sun uzmura uzanapa. <sup>19</sup> Nu iztit aizpkas, sun ma kimtu aizpkas, sun kwizta kirīmtu aizpkas, pari. <sup>20</sup> Nane an puntit kamtarit aizpanua piankamninnash. Nune ap numal chihtira siete kīmacas, siete uru impilkas, izta. Siete kīmane ángelkana mai. An siete kainamm-tuzne, Diosta nijkulturuza, siete pipulura uzturuza, kainanamti. Siete impil panamne siete iglesiakana mai.”

## 2

*Juanne pinkih pat kit siete iglesiara sun pit īninnara. Paiña pit Efeso pipulura uzturuza īninnamtu*

<sup>1</sup> Cristone “na nua kaiztu aizpa Efeso pipuluwa kainammikasha pari,” kizta. Ka parit:

Nane ap numal chihtira siete kima piztus. Nane siete uru impil panam paizkakin chamtus. Sun pitmin Diosta nijkulturuza kainanari. Usne ka kaizta: <sup>2</sup> Wan u kiamtuaizpakas u miza uzamtu aizpakas pianish. Une Dios akwa tinta kal kiamtua, pailtachin. Ukas an kwail kimturuza pashinamtuchi. Minpazha “aune Diospa inintuz makpas” kizamtu. Uspane sunkana chi mai. Usparuza mimaarawane, une uspa pirail kaiztu aizpa piankamanazi. <sup>3</sup> Na akwa tinta naizarakas, une tinta kal kiamicita, pailtachin, kwaizkultachin.

<sup>4</sup> Sunkana nane uruza kurunamtus, u pitchin we akwa. Une Diostakas ussa piantuzakas we pashinamtu. Nawa an ñanchakanain pashiamtuchi. <sup>5</sup> Ka akwaizna, une an ñancha kiara aizpa nijkularain. Mane sun kal kimtuchimai. Umin maiztain, an ñancha kal mamasa kianapa. Uruzpain maizamtukine, Diosta mamasa miamtukine, nane mamasa anpain ish, uruza pailninnana, up impil nakana. <sup>6</sup> Na sun kiznamtukas, une wat minñamtu. Une Nicolaítas awaruzakas, awa mamaztuza kwail kininturuzakas, aliz paranantu. Nakas kawarain usparuza aliz paranamtus.

<sup>7</sup> Mishitmikane Diospa Sinam Izpul kaizta aizpa mirain. Usne wan wanmakmuruza iglesia yalkin ka paranantu: “An sukin kwail kirit aizpa anuppamturuzne Dios iztakin watsal uzanazi.”

*Paiña pit Esmirna pipulura uzturuza ininnamtu*

<sup>8</sup> Cristone ka kaizta: “Na nua kaiztu aizpa Esmirna pipuluwa kainammmikasha pari,” kizta. Ka parit:

Wan sarachasmin, nane an ñancha uztau. Minpa payurakima uznash. Nane irau. Mamasa uztau. Sun pitmin Diosta níjkulturuza kainanari. Usne ka kaizta: <sup>9</sup> Nane u naizamtu aizpa pianish. U puizaruzkana uzamtukas, wan pianish. Uspa uruza sun kiamtukas, une kwazpa awa mai, Diosta pain akwa. Judío awaruzne uruzpa kwail paramtu, uspa Diosta pianchi akwa. Uspane Satanásta kanpaamtu. <sup>10</sup> Mamaz payura naizamtu aizpa ishkuman. Satanásne minpazharuza kajchira sípninnanazi, uruza kwail kianapa. Akkwanchin payukimain naizanazi. Watsal uztain, inakima. Suasne nane uruza chiyura pailta payukima uzninnanash.

<sup>11</sup> Mishitmikane Diospa Sinam Izpul kaiztu aizpa mirain. Usne wan níjkulturuza iglesia yalkin ka paranamtu: “An sukin kwail kirít aizpa anuppamtumikane ñinta naizmanazi.”

*Paiña pit Pérgamo pipulura uzturuza ininnamtu*

<sup>12</sup> Cristone ka kaizta: “Na nua kaiztu aizpa Pérgamo pipuluwa kainammmikasha pari,” kizta. Ka parit:

Sun pitmin Diosta níjkulturuza kainanari. Pa matsih tiz mashti mijmikane ka kaizta: <sup>13</sup> U kiamtu aizpa pianish. Une Satanás inintukin, awa kwail kiamtukin, uzamtu. Une nawa wat níjkulat kit na kaiztit aizpa kiamtu. Awane, u pipulukin, Satanás uzkin, ap nil

kaizmumikasha, Antipasta piantaara. Ussa piantaarakas, une nawa nijkulamíztu.

**14** Nawa nijkulamtukas, nane u kwail kiarít aizpa kainanash. Minpazha ukasa uzmumikane Balaam kamtara aizpa nijkulat kit ñanta kiambu. Balaamne Balacta kurunta, Judío awaruz kwail kianapa. Suasne Balacne Judío awaruza ñininnara, awakana sarit uzkin kumira unara aizpa kuanapa. Suasne Balacne usparuza mamaz ampuwa ashampakasa pitnapa ñininnara. **15** Nicolaítas awakas u uztukin nilchi kamtanamtu, mamaztuza kwail kininnanapa. **16** Ka akwaizna, u kwail kiambíztu aizpa maintain. U kwail maintukine, nane u tukin anash, ap mashtikasa waya kin, uruza ilnana.

**17** Mishimtumikane Diospa Sinam Izpul kaiztu aizpa mìri. Usne wan wanmakmuruza iglesia yalkin ka panamtu: “Nane an sukin kwail kirít aizpa anuppammikasha Dios puntit mij aizpa milanash, watsal uznapa. Nane masas mun putchā ukta panarít ussa milanash. Uk saptamikain sun munmin píankamnazi.”

### *Paiña pit Tiatira pipulura uzturuza ñininnantu*

**18** Cristo ka kaizta: “Na nua kaiztu aizpa Tiatira pipuluwa kainammmikasha pari,” kizta. Ka parit:

Nijkulturuzakas, uspa ñinimumikarakas panari. Sunkana Dios Painkulne, kasu ñ aiztukanain wajmikane, iru mitti naztam aiztukanain wajmikane ka kaizta: **19** Nane u kal kiambu aizpa pianish. Nune nawa pashiamtu aizpa pianish. Nawa nijkulturuza pashiamtu aizpa pianish. Nawa nijkulamtu akwa, une

mamaztuza kain kiwainamtu. U naizamtukas, Diospa kal kiam̄ztui, maza payu marachin. An ñamin ap kal kiarakas, mane an akkwan wat kal kiamti.

<sup>20</sup> U kwail kiamtu aizpa kainanamtu. Uruzne ashampa Jezabel kwail kamtamtu aizpa kain miamtuchi. Us Dios kaizta aizpa pian ish kiztuasmin, p̄irail kaiztu. Ap kiwainmuruza nilchi mininnamtu. Nawa nijkulturuza nilchi kamtanamtu, awakana sarit uzkin kumira unara aizpa kuanapa, ampu mij ashampakasa pittanapa. <sup>21</sup> An ñamin ussa kuruntau, pañia kwail kimtu aizpa chihkanpa, Dios kaiztu aizpa minapa. Usne wan tuntu kwail kimtu aizpa chihkashitchi. <sup>22</sup> Ka akwaizna wan tuntu kwail kimtu aizpa chihkashitkine, nane ussa kamarain ishninnash, ishtu tuanpa. Wan tuntu kwail kiamturuzkas sun ashampakasa kwisha naizarinazi, sun kwail chihkashitchi akwa. <sup>23</sup> Nane sun ashampawa kamtamtu aizpa miamturuza ininnanash. Suasne wan nawa nijkulturuzne na uruza kaiztu aizpa piankamanazi. Nane wan awa minñamtu aizpa pianish. Na wan awa minñamtu aizpa pian akwa, na wan awa kiashimtu aizpa pian akwa, nane wattuzakas watsal kininnanash, wat kiarit akwa. Kwailtuza kwail kininnanash, kwail kiarit akwa. <sup>24</sup> Anpattuzkas ukasa Tiatira pipulu uztuzkas, sun Jezabelpa kwail kamtam miarachi. U wan Satanás kamtamtu aizpa miamtuchi akwa, nane mamaz pit uruza kurunamtuchish. <sup>25</sup> Mane sun pit kurunamtus. Sun pit miarit aizpa nijkul kit watsarain, na

amtu payukima.

<sup>26</sup> Kwailta anuppamtumikane, ap kal kímtumikane nakasa wan awaruza ininnanazi. <sup>27</sup> Ap Taítane nawa sun kal chihkash, awaruza ininnanapa. Sunkanain uruza sun kal chihkananash, awaruza ininnanapa. Uspane wan awaruza tinta ininnanazi, nu kaiztu aizpa kianapa. Miamtukine, uspane usparuza anuppananazi, iru tikasa pailta kízpiantukanain. <sup>28</sup> Maza kíma kínmizka, naztam aizmu. Nane anuppamtumikasha sun kíma aiztukanain namninnash, awa us akwa wat minñanapa. <sup>29</sup> Mishimtumikane Diospa Sinam Izpul kaiztu aizpa míri. Usne wan wanmakmuruza, njiklurtuza paraanamtu.

### 3

*Paiña pit Sardis pipulura uzturuza ininnamtu*

<sup>1</sup> Cristone ka kaitza: “Na nua kaiztu aizpa Sardis pipuluwa kainammmikasha pari,” kizta. Ka parit:

Njiklurtuzakas uspa ininmikarakas panari. Sinam Izpul mijmikane, paiña kiwainmumikasha siete iglesiara inintumikane, siete kíma mijmikane ka kitzu: Wan kímtu aizpa pianish. Une u uzamtukin “Diospa kaiztu aizpa wat kipuspas” kizamtui. Diosta pianchi akwa, une irit awakanain uzamtu. <sup>2</sup> Izkultain. Wan awaruza kiwaintain, nukkulturuz Diostas puzamanpa. Ap Diosne iz kit u kiamtu aizpa pian. U Dios iztukin we kal kiamtu aizpa pianish. <sup>3</sup> An ñamin u njikularit aizpakas u miarit aizpakas njiklurtain. Sun pit miarit aizpa njiklurtuasmin, une sun pit kiarawa. U kwail

kiamtu aizpa chihkat kit Diosta kaiyarawa. Na kaiztu aizpa miamtukine, nane u uzkin maza walkumkanain kainarachin anash, uruza ilnana. Une na amtu payu pianchimai.

<sup>4</sup> Minpazha Sardis pipulura uztuzne kwail kiamtuchi. Sun kwail kimtuchiruzne sinam pñn kwakanain mai. Uspa kwail kiarachi akwa, uspane putchã pñn sappat kit kwaanazi, nakasa uzaanapa. <sup>5</sup> Kwailtas anuppamturuzne putchã pñn sapkwaanazi. Dios uspa mun chiyura pinkihta panarit akwa, nane uspa mun chiyura pinkihta kwiztamamanash. Nane Ap Taitta uzkin paiña ángeltuzkasa an awaruza pianish kiznash. <sup>6</sup> Mishimtumikane Diospa Sinam Izpul kaiztu aizpa mirain. Usne wan wanmaku-  
muropa nijkulturuza paraanantu.

### *Paiña pit Filadelfia pipulu uzturuza ininnantu*

<sup>7</sup> Cristo ka kaizta: “Na nua kaiztu aizpa Filadelfia pipuluwa kainammikasha pari,” kizta. Ka parit:

Nijkulturuzakas uspa ininmikashakas panari. Dios sinam mikane, watchain kaiztumikane, Davidwa llave mijmikane, sun pit kainanantu. Cristo tinta akwa, us pijta siptane, mamazne chihtsachi, awa chiyura nappanapa. Us pijta chihttane, mamazne sipsachi, awa chiyura nappamanpa. <sup>8</sup> Nane u wan kiamtu aizpa pianish. Ap kal kiamtuasmin, nawa we nijkulamtukas, une ap pit mainñarachi. Une nawa miara. Ka akwaizna nane u matsihkin chihtit pijta mijish, Dios pit awaruza kainanapa. <sup>9</sup> Anpane Satanásta kanpaanazi. “Aune Judío awa makpas” kizamtukas, uspane

pirail kaizamtu, nawa kanpaamtuchi akwa. U nawa piankamamtu akwa, nane usparuza u uzkin wakpuj wainñana ininnanash, na uruza pashinamtu piankamanapa. <sup>10</sup> Tinta naizamtuasmin, une ap pit uruza ininta aizpa nijkulat kit watsat mai. Ka akwaizna sun payu taizka, nane uruza watsashinash, na kaiztu aizpa mainmanpa. Sun naizamtu payura taizkane, wan awa an su uzturuzne naizarinazi. Suasne nane nijkulamtuchiruza uspa kwail kiarit akwa ilnanash.

<sup>11</sup> Masakin anash. Sun pit miarit aizpa min kit watsarain, Dios kin namta aizpa kamanpa. <sup>12</sup> Nane kwailta anuppamturuza tinta awakanain namninnanash, ap Diospa yal saktikanain. Uspane Dios yalkis mizurainkas puzamanazi. Nane ap Diospa mun usparuza pananash. Diospa pipulu muntitkas usparuza pananash. Sun chiyuras masas pipulune Jerusalén munta. Nakas ap masas mun usparuza pananash. <sup>13</sup> Mishitmikane Diospa Sínam Izpul kaiztu aizpa miri. Usne wan wanmakmuruza, nijkulturuza paranamtu.

### *Paiña pit Laodicea pipulura uzturuza ininnamtu*

<sup>14</sup> Cristo ka kaizta: “Na nua kaiztu aizpa Laodicea pipuluwa kainammikasha pari,” kizta. Ka parit:

Nijkulturuzakas uspa ininmikarakas panari. Sun pit kaizmumikane watchain kaiztu. Sun watcha paramtumikane Diostas azi. An su samtuasmin, Diosne us akwa wan sarit. <sup>15</sup> U wan kimtu aizpa pianish. Masetne une Diablo

miwara chashiamtu. Masetne une Cristo miwara chashiamtu. Nane uruza kurunnamtus, maza mi naanapa. <sup>16</sup> Diablo mikas Cristo mikas naashitchi akwa, nane uruza kwainarinash. <sup>17</sup> Une “kwazpa makpas” kizamtu. “Au kiamtu aizpa wari” kizamtu. “We chi mijmakpas” kizamtu. Sunkana nane uruzakas kaiznamtus. Une wat kulamtuchi mai. Tapail mai. Puiza mai. Kasu kai chikanain mai. Piltim awakanain mai. Wat nijkulamtuchi mai. <sup>18</sup> Ka akwaizna nawa sairawa, u we mij aizpa sappanapa. Sunkana kitpa. Nane uruza kurunnamtus, ap uru īn ainnarit mij aizpa painapa, watcha kwazpa awakanain namanapa. Putchā pīn na mij aizpa paizha, kwaanapa, piltim uzamanpa, mitsal kiamanpa. Kasu pih na mij aizpa paizha, kasura ninapa, kasu kai panapa.

<sup>19</sup> Nane wan nawa pashimtruza kurunnamtus, kwail kiamanpa. U na kuruntu aizpa mimtukine, usparuza ilnanash. Ka akwaizna tinta kulnintain. U kwail kimtu aizpa masain wan maintain, Dios miwara ianapa. <sup>20</sup> Mirain. Nane pijtakin akwanat kit awaruza sainamtus, awakas aanapa. Minpazha ap pit mirane, sun pijta chiktane, nane us uzkin napnash, uskasa uzan. Uskas nakasain izmuruzkanain kwasan.

<sup>21</sup> Nane kwailta anuppamturuza na inintukin nakasa uznninnanash. Nakas wan kwailta anuppanarau. Ka akwaizna ap Taittane us inintukin nawa uzninta, uskasa ininna. <sup>22</sup> Mishimtumikane Diospa Sinam Izpul kaiztu aizpa miri. Usne wan wanmakmuruza iglesia yalkin panamtus.

## 4

*Chiyura wantuzne “Diospa kwisha wari” kizpusi*

<sup>1</sup> An kwiztane chiyura iztuasmin, nane pījta chihtit iztau. An ñancha nakasa paramtumikane mamasa nakasa iru kwil ustukana tinta paranarit. Usne nawa ka kizta: “Apa nuri. Nane nua kwizta chiwazha kiarimtu aizpa annash,” kizta.

<sup>2</sup> Sun urain Dios S̄inam Izpulne nawa piz kit na kainkizpamtu aizpa izninta. Sun urain nane chiyura katsa mikwa uzmu iztau. Mazane, Diosne, sun katsa mikwa inintukin uzta. <sup>3</sup> Sun uzmikane jaspe maiza ukkanain iztit. Kwanam cornalina maiza ukkanain iztit. Sun pikamta mikwa uzmu isalta panainta. Pijtammin wirit, esmeralda ukkanain naztam iztit. <sup>4</sup> Mikwa uzmukin mamaz veinticuatro uzmu salpinwal uzarit. Veinticuatro ilaparuzne putchā pīn kwaksham kwaat kit sun uzmura uzarit. Uspane uru chutta kizpura ijmu sarit. <sup>5</sup> Diospa uzmukis īnkanain iztit puztit. Dios parakane, ippa parit. Paiña matsih uzmukin siete impil putpanaritkanain aitzu. Diospa S̄inam Izpulne siete impilkanain iztit. <sup>6</sup> Paiña matsih uzmukin maza katsa s̄inam pikinaniztit. Ampara uztuzne paiña uzmukin salpinwal kunarit. Nane uspa kizpukin punsihmalkas kinijmalkas akwan kasu waj iztau. <sup>7</sup> An ñancha uzmikane katsa ishukana iztit. Mamaz uzmikane wakara ampukanain iztit. Mamaz uzmikane paiña matsih awakanain waj iztit. Minpara uzmikane katsa wam piltukana iztit. <sup>8</sup> Wan ampara uztuzne seis ilsih waj. Wan seis ilsih wajtuzne akwan kasu

wajsuh pain. Payukas amtakas chihkatchin ka kizara:

“Diosne katsa ininmika i.

Wan awaruzne ussa wakpuj waiñarawa,  
sinammika akwa.

Wan sarachasmin, usne uzta. Makas uzi. Mamaz payukas kailnazi.”

<sup>9</sup> Sun uztuzne ussa “kwisha wari” kizat kit “aishtaish” kizara. Pailta payu uzmikasha wakpuj wainñara. <sup>10</sup> Ampara uztuz “Dios kwisha wari” kizarawane, veinticuatro ilaparuzne ininmika uzkin wakpuj wainñat kit pailta payu uztumikasha “kwisha wari” kizara. Uspa uru chutta wizpizat kit paiña uzmukin sua taat kit ka kizara:

11 “Nune kwisha wari. Nune au Anpat Dios i.

Wan chiwal saritmika akwa, nune tinta i.

Wan chiwal sashimtu akwa, nune wan sara.

Ka akwaizna wan awane nua ‘kwisha wari’ kizarawa.”

## 5

### *Pinkih parit aizpakas pirikukas*

<sup>1</sup> Suasne Diosta us uzmukin uztu iztau. Usne paiña numal chihti pamans parit iptit pinkih mut kit uzara. Sun iptit pinkih sietekima pustit. <sup>2</sup> Maza tinta ángeltakas iztau. Usne tinta ka mimara: “¿Minma wat awa an iptit pinkih nakpiz kit izshinasa?” kizta. <sup>3</sup> Minminkas chiyuraskas, minminkas pilmal uztuzkas, minminkas pil ayuktaskas iptit pinkih nakpizmanamtit. Minminkas pinkihta parit aizpa izmanamtit. <sup>4</sup> Minminkas pinkihta nakpizna saimanamtit. Minminkas sun pinkihta iztuchi akwa, nane

tayal kit tinta aztu arau. <sup>5</sup> Mazane ilaparuztas nawa sunkana kaizta: “Anneme azmun. Izti. Cristone, ishu muntitmkane, at kit paiña aliztuza anuppanara. Judáwa kwalkas ininmika Davidwa kwal i. Sun iptit pinkihne sietekima pusta. Usmin nakpiz kit izshinai,” kizta.

<sup>6</sup> Nane sun píriku tiritkana Dios ininmu uzkin iztau. Usne ampara uztuz uzkinkas, ilaparuz uzkinkas kunta. Usne siete pulkas siete kasukas waj. Paiña kasu Dios sinam Izpulkanain iztit i. Paiña kasune wan sura iznamtu. <sup>7</sup> An Pírikune Dios uzkin it kit paiña numal chihtikis sun iptit pinkih sapta. <sup>8</sup> Iptit pinkih saptawane, ampara uztuzkas veinticuatro ilaparuzkas Píriku kunkin wakpuj wainñara. Uspa wantuzne guitarrakanain mumazi. Uru wazkas, ti puzpi inciensokana impaktamtumumazi. Níjkulturuz Diosta paikukane, uspa paikumtu aizpa ti puzpi inciensokana iztit. <sup>9</sup> Uspane masas kanta kaiz kiara:

“Nune sun iptit pinkih sap kit  
sun pinkih sietekima pustit nakpiz kit izshinai.”

Nu au akwa piantarit akwa,  
up aimpi puzta akwa, Diosne wan awaruza  
mamaz pit paramtuza, kwailtas painara,  
awa kwail kiarit aizpa sinam sananapa,  
Dioskasa uzanapa.

<sup>10</sup> Nune usparuza akwanara, pariya namanapa,  
Diospa kal kianapa.

Nune usparuza uspa kal chihkanazi,  
an sukin ininanapa.”

<sup>11</sup> An kwiztane nane akkwan ángeltuza minat  
kit iznaraus. Sun ángeltuzkas, sun ampara uz-

tuzkas, sun ilaparuzkas katsa mikwa ininmukin salpinwal kunarit. Akkwan ángel pura akwa, nane mizurainkas wiāsachish. <sup>12</sup> Uspane ka tinta paranara:

“An Pirikune au kwail akwa irit akwa, aune sunkana kaizarawamakpas:

‘Usne wantuza ininnashinai.

Wan chiwal pian i. Wan chiwal mij. Tinta mika i.

Awa us kaizta aizpa miarawa. Usne wari’ kizarawa.”

<sup>13</sup> Nane wan chiyura uztuzakas, an pilkin uztuzakas, pil ayukta uztuzakas, wan pira uztuzakas mirau. Sunkana kanta kaizara:

“Katsa ininmukin uztumikashakas Pirikurakas ‘uspa paas kwisha wari’ kiztawamakpas.

Uspa kaizamta aizpa miarawamakpas. Uspa paas tinta wai i.

Pailta payukima ‘kwisha wari’ kizarawamakpas.”

<sup>14</sup> Ampara uztuzkas ka kizara: “Uspa kaizara aizpa watcha i,” kizara. Sun veinticuatro ilaparuzkas Dios uzkin wakpuj wainñara.

## 6

### *Siete pustit pinkih*

<sup>1</sup> Suasne, nane Pirikura, maza sieteras pustit pinkihta nakpiztamikasha, iztau. Suasne nane maza ampararuztas uztumikasha iztau. Usne ippa aztukanain nawa ka kaizta: “Apain at,” kizta. <sup>2</sup> Na iztuasmin, nane putchä caballo iztau. Caballora uzmikane chihtira tiznam mura. Uru chutta saptawane, sun mikwane waya kin irit, wantuza anuppanana.

<sup>3</sup> Píriku paas sieteras pustit pinkihta nakpiztawane, nane paas ampararas uzturuz kaizta aizpa mirau. “Apain at,” kizta. <sup>4</sup> Na iztuasmin, suasne mamaz kwanam caballo amtu iztau. Katsa mashti saptawane, caballora uzmiwake au sukin irít, awa usparuzkasain waya kit kit usparuzpain piantaanapa, kalpain uzamanpa.

<sup>5</sup> Píriku kutña sieteras pustit pinkihta nakpiztawane, nane kutña ampararas uzturuz kaizta aizpa mirau. “Apain at,” kizta. Na iztuasmin, maza tilkaya caballo amtu iztau. Caballora uzmiwake yawa ustakas anizna chihtira milta. <sup>6</sup> Nane ampara uztuz paizkakin maza kaiztumikasha mirau. Akkwan kumira wachi akwa, sunkana kizta: “Maza payu kal kit pialkasa tarawai, maza kilo chara pippa sapna. Maza payu kal kit pialkasa tarawai, kutña kilo cebada pippa sapna. Olivos pippa tirakas wankail pippa tittakas kwail kimun.”

<sup>7</sup> Píriku ampara sieteras pustit pinkihta nakpiztawane, nane amparamika ampararas uzturuz kaizta aizpa mirau. “Apain at,” kizta. <sup>8</sup> Na iztuasmin, maza naram caballo amtu iztau. Caballora anuzmikane “irít” munitit. Paiña kwizpa mazane irittas azi. Uspane su kakwa wemin awa uztukin ininnashinai, usparuza piantanapa. Mazantuzne waya kiat kit iara. Mazantuzne yak kiat kit iara. Mamatzuzne ishtu kiat kit iara. Anpane kalpa kwarít akwa iara.

<sup>9</sup> Píriku cinco sieteras pustit pinkihta nakpiztawane, nane irít izpultuza iznarau. Dios pit akwa, awane usparuza piantanara.

Uspa pit mamaztuza kaiznara akwa, awane usparuza piantanara. Uspene Diospa incienso mishari pulaman purara. <sup>10</sup> Usparuzne tinta kaizara: “Nune au Anpat Dios i. Watcha mika akwa, wat nil kimtui. ¿Miza urama an sukin uztuza mimanash, uspa kwail piankamanapa? Aumiza piantantu akwa, ¿Miza uruma usparuza naizninnanazi?” kizara. <sup>11</sup> Suasne putchā pīn kwaksham wan usparuza milanara. “Akkwan payuchikima kwaizkultain,” kiznara. Mamaz aimpihshtuzne, mamaz Cristora kal kiwaintuzne iarınazi. Kwail awane uruza piantamukanain usparuza piantananazi. Sun payura kwaizkul kit tıriztain, wan pailnakima. Suasne Diosne kwailtuza naizninnanazi.

<sup>12</sup> Píriku seis sieteras pustit pinkihta nakpiztawane, nane wan iz kit tinta ulpiantu maztau. Pānne tilchakta parit, tilkaya pīnkanain. Wan intiruz palapchane kwanam aimpihanain parit. <sup>13</sup> Wan kimane chiyuras pilta taizara. Tinta inkwa parane, ti ulpiantane, pippa wane, wan pippa pilchukas taizarım. Sunkana kimane taizara. <sup>14</sup> Chiyune maiz kit karit, maza kih nulsapiztitkanain. Wan inkalkas wan su pi paizkakinkas uspa uzmukis maizarit. <sup>15</sup> An sujis katsa ininmuruzne katsa uk kultakas inkal pilchirarakas iara. Wan awaruza inintuzkas, kwazpa awaruzkas, suldarura inintuzkas, tinta awaruzkas, kiwaintuzkas, anpat mijchiruzkas ishkuat kit sun kulta kulana iarit. <sup>16</sup> Uspene inkaltakas katsa uktakas ka kaiznara: “Aumiza taizarain. Aumiza kulanintain, Dios paña uzmukis aumiza izmanpa, Píriku aumiza

naizninnamanpa. <sup>17</sup> An tinta naizninamtú payu me taizta. Sun payu minminkas tailchasachi.”

## 7

### *Diosne paiña kiwainmuruza watsananazi*

<sup>1</sup> An kwiztane nane ampara ángeltuza piamal sukin uzara iztau. Uspane ampara tinta inkwa mijazi. Uspane wan inkwa surakas pirakas, tirakas nuppaintuchi; panintachi mama.

<sup>2</sup> Suasne nane mamaz ángel pán puzmuras amtú iztau. Paiña chihtíkin Diospa pinkih pam mura, Dios akwa panapa. An Diosne watcha uz. An ángelne ampara ángeltuza tinta kwianara. Usne usparuza ininnara, surakas pirakas wan kwail kianapa. <sup>3</sup> Ka kaiznara: “Au Diospa kal kiwaintuza uspa kinijkin Diospa mun panamtuchi akwa, piltakas pirakas tirakas kwail kiman,” kiznara.

<sup>4</sup> Awa kinijkin Diospa mun panarittuza wianta. Wan Israel painkulpa kwaltuza wiantawane, 144.000 wianta. <sup>5</sup> Pailta uspa kwal Diospa mun panat kit ka wan wiannara:

Judáwa kwalkas 12.000 wianta.

Rubénpa kwalkas 12.000 wianta.

Gadpa kwalkas 12.000 wianta.

<sup>6</sup> Aserpa kwalkas 12.000 wianta.

Naftalíwa kwalkas 12.000 wianta.

Manaséspa kwalkas 12.000 wianta.

<sup>7</sup> Simeónpa kwalkas 12.000 wianta.

Levíwa kwalkas 12.000 wianta.

Isacarpa kwalkas 12.000 wianta.

<sup>8</sup> Zabulónpa kwalkas 12.000 wianta.

Josépa kwalkas 12.000 wianta.

Benjamínpa kwalkas 12.000 wianta.

*Akkwan awa putchā pīn kwaarit*

<sup>9</sup> Suasne nane akkwan awa iznarau. Wan suraskas, wan kwaltaskas, wan pipuluraskas aara. Wan pit param piantuzkas aara. Uspene Dios ininmu uzkinkas Piriku kunkinkas sua punak kit kunara. Wanta wiānsachi, pīna akkwan akwa. Putchā pīn kwaksham kwaat kit kanari kih chihtira muara. <sup>10</sup> Uspa wanne ka tinta kwianara: “Au Diosne us ininnamkin uzi.

Uskas Corderokas aumīza watsat milnara.”

<sup>11</sup> Wan ángeltuzkas veinte y cuatro ilaparuzkas ampara umuruzkas Dios ininmu uzkin salpiñwal kunarit. Uspene paiña ininmu uzkin wakpuj wainñat kit uspa kinij pilta paltuarit. Wakpuj wainñamtasmin, Diosta ka kaizara:

<sup>12</sup> “Sunkana kirinazi.

Usne kwisha wari. Usmin wan pian i. Diosta aishtaish kiztai.

Us kaizta aizpa miarawai. Usne wan chiwal kishinai.

Usne tintamika i.

Au Diosta pailta payukima ka kiztai.

Sunkana kirinazi.”

<sup>13</sup> Mazane ilaparuztas nawa ka mimara: “Sun putchā pīn kwaksham kwaarittuzne ¿Minma mai? ¿Mintasma aazi?” kizta. <sup>14</sup> Nane ka sinkarau: “Ap Anpat, nune pian.” Usne nawa ka kaizta: “Uspene tinta naiztu payura tailchaat kit anuppaarit, mazam payura maizamanpa. Uspa pīn pattara, uspa kwaksham pīn an putchā namanapa. Piriku uspa akwa irit akwa, Diosne uspa kwail kiarit aizpa sinam sashina, pīn an putchā kultukana.”

<sup>15</sup> “Ka akwaizna, uspane Dios ininmu uzkin purai.

Payuwarakas amtawarakas paiña yalkin ussa ki-wainat kit wakpuj wainñamtu.  
 Usne paiña ininmu uzkin uzi.  
 Usne usparuza iznat kit watsanamtu.  
**16** Uspene yak kiamanazi. Kwazi kwashiamanazi.  
 Pānne usparuza pakmanazi.  
 Pānne usparuza īn malnamanazi.  
**17** An Pirikune Dios ininmu uzkin uzi.  
 Usne píriku izmumikakana wantuza iznanazi.  
 Usparuza wat miwara ininnat kit usparuza wat iz-nanazi, paita payukima chiyura uzanapa.  
 Diosne uspa kappi puztít aizpa sínam kihat kit usparuza an tayalninnamanazi.”

## 8

### *Siete pinkihta pustít nakpiz kit chihtu*

**1** Píriku siete pinkihta pustít nakpiztawane, chiyura paizka urakima kalpain parit. **2** Suasne siete ángeltuza iznarau. Dios iztakin kunamtuas-min, Diosne usparuza pakaish pakaishtha iru usmu kwil milanarít. **3** Suasne mamaz ángelne sua pi-anat kit uru wazta inciensokasa mut kit incienso impakmu misharikin kunta. Sun uru mishari Dios ininmu uzkin uzta. Akkwan incienso wazta win kit ussa milara, sun misharira impaktanapa. Diosta piantuzne Diosta paikuat kit inciensokas misharira unara. **4** Ángelne sun incienso impaktarít ishkas, Diosta piantuz paikuamtu aizpakas Dios uzta nuninta. **5** Suasne usne uru waz inciensokasa chihtira mut kit mishariras imchaj īn ukkat kit uru wazta winta. Imchaj īn inciensokasa uru wazta wintawane, au sura kiakpinta. Suasne ippa

ĩn taiztat kit ippa tinta azta. Pil ulmalmukas tinta ulmalta.

### *Iru usmu kwil*

<sup>6</sup> Siete ángeltuzne, iru usmu kwil mijtuzne, iru kwil watsat kit kunara, iru kwil usna.

<sup>7</sup> An ñancha ángelne paiña iru kwil usta. Iru kwil ustawane, ainki tih hielokas, ĩn aimpikas kajaram an sura taizara. Akkwan su, kakwa chi sukanain impaktarit. Sua kakwa chin tika, kakwa chin pítkas impaktarit.

<sup>8</sup> Mamaz ángelkas paiña iru kwil usta. Ustawane, katsa ñinkalkana ĩn aiztukanain ñam pira taizta. Kakwa chin ñam pine aimpikanain namtit.

<sup>9</sup> Kakwa chin pishkaru ñam pira uzta aizpa iarit. Kakwa chi kanua pira chamtu aizpa pi kwaarit.

<sup>10</sup> Mamaz ángelkas paiña iru kwil usta. Ustawane, chiyuras katsa kimane impil aiztukanain kakwa chi ainki pirakas, kakwa chi pi kasurakas taizta. <sup>11</sup> An kimane “tain” munazi. Kakwa chin pine tain namtit. Kwazi tain namtit akwa, awa pi kuarit akwa, akkwan awane iarit.

<sup>12</sup> Mamaz ángelne paiña iru kwil usta. Ustawane, kakwa chin pánkas kakwa chin palapchakas kakwa chin kimakas kwiari. Kwiari akwa, kakwa chin aizarachi. Kakwa chin payuwarakas, kakwa chin amtawarakas chinkas aiztachi.

<sup>13</sup> Suasne nane katsa wam chiyura piltu iztau. Usne tinta ka kaizta: “An sukin uztuzne naizarinazi. Uspane an tinta naizarinazi. Mamaz kutña ángeltuz uspa iru kwil usakane, an sukin uztuzne an tinta naizarinazi.”

**9**

<sup>1</sup> Mamaz ángelne paiña iru kwil usta. Ustawane, nane mamaz kwail ángelta chiyuras pilta taizta iztau. Ángelne kímakana iztit. Ainkih kulta kunta, kulkin uztuza ininnanapa. <sup>2</sup> Ainkih kulta chíttawane, akkwan ishne katsa ín usaptakanain puzara. Sun ish kwashpa chiyura nurawane, wan sumal it kit pán tilkwil panintit. <sup>3</sup> Sun ishtas akkwan katsa chíttuzne puzat kit wan suwara pilara. Sun chíttuzne awaruza kwaanashinai, kwisha ishanapa. Pil tuil tuil kwatkanain ishanazi. <sup>4</sup> Diosne usparuza pit piltakas, wan katsa pit pijtamtkas, wan tirakas kwail kimarpa ininnara. Uspane Diospa mun paiña kinijta panarachiruza kwail kinashinai. Usparuza kwanashinai. <sup>5</sup> Uspane awaruza piantamanamtít. Awaruza kwaanashina, cinco mishtakima ishanapa. Pil tuil tuil awara kwatkanain ishanazi.

<sup>6</sup> Sun payura ishamtu akwa, awa ina kwianazi. Ina wanmalmanazi. Awa iashimtukas, imanamarinazi.

<sup>7</sup> An katsa chíttuzne caballo waya kishimtukana izarit. Uspane uru chuttakanain ijarit. Uspa matsih awakanain izarit. <sup>8</sup> Uspa ashne ashampa akskanain iztit. Uspa sularuzne ishu sulakana izarit. <sup>9</sup> Uspa ña iru iptitkanain iztit. Uspa ilsih tinta inkwakanain azmu. Akkwan carro caballo waya kin iamtkanain azmu. <sup>10</sup> Uspa miri katsa chíppukanakas, tuil tuil mırıkanakas izarit. Uspane uspa mırıkasa awaruza cinco mishtakima kwail kinashinai. <sup>11</sup> Chíttuza ininumikane, ainkih kulkis ángelne, “azpiantumika” muntit. Hebreo pitta *Abadón* muntit. Griego pitta *Apolión*

muntit.

<sup>12</sup> An ñancha kwisha tayaltu payu píntit. Mama paas kwisha tayaltu payu taiznapain.

<sup>13</sup> Mamaz ángelne paiña iru kwil usta. Ustawane, nane uru unam misharira Dios iztakin iztau. Ampara pul misharimara kunarit. Sun misharikis minpazha paraka mírau. <sup>14</sup> Sun paramtumikane sun ángel iru kwil mijmikasha ka kizta: “Ampara ángeltuzne katsa Éufrates pira kuhtit pura. Usparuza chihtnarain.”

<sup>15</sup> Suasne an ampara ángeltuzne chihtnarit, uspa suldaruruza ininnanapa, kakwa wemin awaruza piantananapa. Uspane, sun urain, sun mishtain, sun añorain kapal kinpain sarit, sun kal kianapa. <sup>16</sup> Kwisha akkwan awa suldaru caballora anuzturuza mírau. Dos cientos millones purazi.

<sup>17</sup> Sunkana iztau. Caballoruzakas caballo anuztuzakas iznarau. Caballora anuzturuzne uspa pecho irukasa iptit uzara. Ínkanain iztit. Pijtam jacintokanain iztit. Azufre paktukanain iztit. Caballo kízpune katsa ishu kízpukanain iztit. Uspa pitkis Ínkas ishkas azufrekas puzta. <sup>18</sup> Kakwa wemin awaruzne iarit, Ínkasakas, ishkasakas, asufrekasakas. Sun kutña naizmu caballo pitkis puzara. <sup>19</sup> Caballoruzne akkwan kwail kinashinai, uspa pitkasakas, uspa mírikasakas. Uspa míriuzne kamta kízpukanain izarit. Uspa kamta kízpuksa kwail kiamtu.

<sup>20</sup> Mamaz awaruzne, mamaz an kutña naizmukasa irachi awaruzne, uspa kwail kiashimtu aizpa chihkaarachi. Diablo izpultuzakas mamaz dios tikana sarítuzakas

wakpuj waina kwainñarachi. Uspa diosne awakanain iztit sarit. Urukasa, pialkasa, ukkasa, tikasa sarit. Uspa diostuzne izasachi, miasachi, chaasachi. <sup>21</sup> Uspa kwail kiashimtu aizpa chihkaashitchi. Piantaashimiztu. Kappacho kiashimiztu. Mamazpa ashampara kwail kiashimiztu. Walkwan kamamiztu.

## 10

### *Maza ángelne iptit pinkih mij*

<sup>1</sup> Mane mamaz tinta ángel chiyuras wanishkasain kihshu iztau. Paiña kízpukin kwilchi aizta. Paiña matsih pánkanain nazztam iztit. Paiña mittikas pimpulkas īnkanain iztit. <sup>2</sup> Usne paiña chihtíkin ainki iptit pinkih naksarit mijara. Paiña numal mitti pira kunta. Paiña kwiyamal mitti pilta kunta. <sup>3</sup> Tinta kwianta, katsa ishu aztukanain. Kwiankane, siete ippa aztu mirau. <sup>4</sup> Siete ippa azarawane, nane uspa paraamtu aizpa pinkihta pashirau. Nane maza chiyuras kaizka mirau. Ka kizta: “Sun siete ippa kaizara aizpa puntain watsari. Pinkihta pamun.”

<sup>5</sup> Nane sun ángel numal mitti pirakas kwiyamal mitti piltakas kuntamikasha iztau. Sun ángelne paiña numal chihti chiyura annakta. <sup>6</sup> Usne Diosta akwara, us kaizmiztu aizpa piankamanapa. An Diosne pailta payukima uztu. Chiyukas, sukas, pikas sara. Wan chiwal wa aizpa sara. Usne ka kaizta: “Sun urain taiznapain. <sup>7</sup> Sun ura taizkane, minpa ángel iru kwil usmíztuasmin, Diosne us puntit mijat aizpa wan kirinazi, us kishit aizpa paiña kainammtuza, paiña kiwaintuza an ñancha kainarítkanain.”

<sup>8</sup> Diosne, sun chiyuras nawa pararitmikane, mamaña nakasa kwinta kit kit kaizta: “Ángel numal mitti pirakas, kwiyamal mitti piltakas kuntuñikasha itti. Usne iptit pinkih paíña chihtira nakpiztit mij. Sun iptit pinkih pizti,” kizta. <sup>9</sup> Nane ángelta it kit iptit pinkih milanpa paikwarau. Usne nawa ka sinkash: “Piz kit kwatkweri. Pitkin pinkih kumtuasmin, chap kulnazi, mishkikanain. Pusunmal taizkane, tain kultinazi.”

<sup>10</sup> Nane iptit pinkih ángel chihtiras sap kit piz kit kwarau. Ap pitne chap kultish, mishkikanain. Iptit pinkih kwatpane, ap pusunmal tain kultish. <sup>11</sup> Suasne nawa kaizish: “Mamasa nune Dios wan awaruza kinamtú aizpa kainanarawa. Sun pit mamaz pit paramtuzakas, katsa inintuzakas, mamaz sura uztuzakas kainanarawa.”

## 11

### *Paas kainammtuz*

<sup>1</sup> Nawa anizmu ti milatmikane nawa kaizta: “Kuhs kit at, Diospa yaltakas, unam misharirakas anizna. Wan sua wakpuj wainñamturuza wianti.

<sup>2</sup> Diospa yal pianamal anizmun, sua Diosta pi-ançhiruzne chaamtú akwa. Uspene cuarenta y paas mishkima an Diospa pipulura, Jerusalén pipulura, azpiananazi. <sup>3</sup> Sun payura nane ap paas kainammtuza ininnash, kutña año kakwakasa na akwa paranpa. Awa uspa kwail akwa tayalam-tuchi akwa, uspa paasne til pñ kwailnazi,” kizta.

<sup>4</sup> An paas kainammtuzne olivos tikanain izpailta. Uspa paasne Dios izardakin impil unamkanain izpailta. Uspa paas Dios izardukin uzpailta. An Diosne wan sura ininmika i.

<sup>5</sup> Minpazha usparuza kwail kishitne, uspane uspa pittas ĩn puzninnazi, uspa aliz kultuza impaktanapa, ianapa. Usparuza piantashitne, sunkana iarınazi. <sup>6</sup> An sukin Dios kaizta aizpa paramtuasmin, uspa paas kainammtuzne chiyu sipninshina, alu kimarpa. Kwazikas aimpi namninshina, wan surakas, an sukin uztuzakas akkwan pijikima naiznинshianapa.

<sup>7</sup> Kainammtuz Dios pit kainana paitikane, sun aliz kalpakanane kwisha ainkih kultas nut kit an paastuza waya kit kit anuppat kit piantanazi.

<sup>8</sup> Paas irawane, sun katsa pipulu mikin sua tuailnazi. Sun pipulura awane au Anpatta, Cristora, piantaara. An pipulune Sodoma pipulukanakas Egipto sukanakas munarit, sua awa kwisha akkwan kwail kiarit akwa. <sup>9</sup> Mamaz pipuluras awakas, mamaz kwaltuzkas, mamaz suras awakas, mamaz pit paramtuzkas, an paas irittuza kutña payu kakwakasa izanazi. Pulta kamninmanazi. <sup>10</sup> Uspa irit akwa, an sukin uztuzne watsal kulanazi. Watsal kulamtu akwa, uspane chiwazha usparuzpain milaanazi, sun paas Dios pit kainammtuz usparuza naizninnara akwa.

<sup>11</sup> Kutña payu kakwakasa pailkane, Diosne an paas irittuza kuhsninnat kit mamasa kakulninnara. Sun paasta izararuzne kwisha ishkuarit.

<sup>12</sup> Suasne an paasne maza chiyuras paraka miilta. Usne usparuza ka kaizta: “Apa nurain.” Suasne uspane chiyura wanishkasain nultia. Numtazasmin, aliztuzne usparuza izara. <sup>13</sup> Sun urain tinta su ulmu ara. Su ulmu at akwa, pitchin pipuluruzne nainñat kit azpiantit. Siete mil awa

iara. Irachiruzne ishkuat kit maizat kit chiyuras  
Diosta “kwisha tinta i” kizara.

<sup>14</sup> An kwizta naiztu payu píntit. Mama maza  
kwisha naiztu payu taiznapain.

### *Minpa iru kwil*

<sup>15</sup> Minpa ángelne paiña iru kwil usta. Ustawane,  
chiyura akkwan tinta paraka miara. Ka kaizara:  
“Au Anpat Dioskas Cristokas au sukin aulta, wan  
iñinna.

Usne pailta payurakima iñinnanazi.”

<sup>16</sup> Veinticuatro ilaparuzne uspa iñinmukin, Dios  
iztakin uzara. Sun pit miarawane, uspane uspa  
matsih pilta palsumal wakpuj wainñat kit ussa  
<sup>17</sup> ka kaizara:

“Au Anpatta Au Dios wan kimtumikasha aishtaish  
kiztumakpas.

Nune ma uz. Ñaminkas uzta.  
Wan payukimakas uznazi.

Nune me tinta iñinna masamízta.

<sup>18</sup> Wan sura uztuzne, up pit miráchiruzne, aliz  
kularít.

Nune awaruza maizninna masamíznazi.  
Iríttuz kuhestawane, nune iríttuza ‘kwail kiarít’  
kizna mansamíznazi.

Nune up kiwaintuza, up pit kainammtuza  
chiwazha mílam milananañazi.  
Nune Diosta piantuza milananañazi. Nune Diosta  
wakpuj wainturuza milananañazi.

Katsaruzakas, ainkiruzakas milananañazi.  
Nune an sukin kwail kiaríttuza wan kawal ki-  
nariñazi.”

<sup>19</sup> Suasne chiyura pijta azpiztawane, nane  
Diospa katsa yal ayukta paiña winmura iztau.  
Ñamin Moisésne sun winmukin chiwazha tara.

Dios paiña kwalta kin namtit aizpa sua watsarit. Suasne ippa azkane, īnkanain taizara. Su ulmu ara. Akkwan ainki tih hielokana, pia kasupatsa, chiyuras taizara.

## 12

### *Ashampakas katsa piaintikanakas*

<sup>1</sup> Chiyuras chiwazha iztasparit aizpa kai puzta: maza ashampane pīn pān aiztukanain kwaarit. Us kunkin palapchakanain iztit. Paiña kizpu chuttara doce kimakanain iztit wajazi. <sup>2</sup> An ashampane pijakasa azi. Pashpa warit. Pija ishtika, tinta kwianta, pashpa nishna. Kwianta, pija ishtu akwa. <sup>3</sup> Suasne chiyuras mamaz chiwazha iztasparit aizpa kai puzta: Katsa kwanam piaintikanain iztit. Usne siete kizpukas, diez pulkas, wajazi. Wan kizpura chutta ijarit. <sup>4</sup> Paiña mīrikasa kakwa wemin chiyura kimara ilnat kit kimara pilpara kiakpinta. Sun katsa piaintine ashampa iztakin kunta, ashampawa pashpara kwashimtu akwa. Pashpa nishnapain. <sup>5</sup> Suasne ashampane maza ampu pashpa mīlta. An pashpane wan sukin uztuza tinta īninnanazi. Ashampa maza pashpa mīltawane, Diosne sun ashampawa painkul chiyura, us iztukin, us īnintukin mīlta. <sup>6</sup> Sun ashampane pul sura ikaintit. Suasne Diosne us akwa uzmu kapal sarit, mil dos cientos sesenta payukima sua kuanapa.

<sup>7</sup> Kwitztane chiyura waya kiara. Katsa ángel Miguelkas paiña ángeltuzkasakas, katsa piaintikanainkasa waya kiara. Sun katsa piaintikanakas paiña ángelkasakas mamatzuzkasa

waya kiara. <sup>8</sup> Uspane anuppamanamarit. Uspane chiyura uzamanamarit. <sup>9</sup> Sunkana Diosne sun katsa piainti, sun katsa kamta, chiyuras ininta. Usakas paiña ángeltuzakas pilmal ininnara. An antikwa kamtamne, Diablocas, Satanáskas munitit. Usne wan awaruza pirail kaiznanara, ñan miwara ianapa.

<sup>10</sup> Suasne nane chiyura tinta parammikasha mirau. Usne ka kitzuazi:

“Mane au Diosne awaruza kwailtas tainak kit watsananazi. Usne wanta tinta ininnanazi.

Cristokas wanta ininnanazi.

Diosne au aimpihshtuzpa kwail paramturuza chiyuras ininnara.

Sun kwail paramturuzne Dios iztakin payuwarakas amtawarakas níjkulturuzpa kwail kizara.

<sup>11</sup> Au aimpihshtuzne Diablorain anuppaarit, an Píriku uspa akwa irit akwa.

Paiña aimpikaza usparuza sinam sananara.

Uspane mamaztuza an Pírikura níjkulpuspas kizara, ishkwatchin.

Uspane Cristo akwa ina ishkuarachi.

<sup>12</sup> Wan chiyura uztuzne watsal kultain.

An sukin uztuzkas, wan ñam piwara chamtruzkas, tinta naizarinazi,

Diablo kihshta akwa, us wan sura uztuza naizninnanapa.

Akkwan payukima uztuchi akwa, usne ukasa kwisha aliz kulnazi. Suasne Diosne ussa ilnazi.”

<sup>13</sup> Sun aliz piaintkana pilta inintawane, usne sun ashampa painkul mijatmikasha kanpat kit

kwail kimizna minta. <sup>14</sup> Suasne Diosne an ashampara paas katsa wam ilsih milazi, attish pul su watsaritkin tinta pilnapa, aliz piainti us uzkin pi-anamanpa. Tane Diosne ussa chiwazha wenamtu aizpa kwinnazi, kutña año kakwakima. <sup>15</sup> Aliz piaintine paiña pitkis katsa pi kwazikanain irak kit kwararit, ashampara pi kwarinpa. <sup>16</sup> Sunkana pilne ashampara kiwainta. Sun pilne aliz piainti pi kwarakta aizpa tuk kit wan kaninta. <sup>17</sup> Ka akwaizna sunkana akwa sun aliz piaintine an ashampara kwisha aliz kultit, ussa kwail kirachi akwa. Suasne usne ashampawa kwaltuza, Dios pit mimitruza, Jesús kaizta aizpa mimitruza it kit waya kinarit. <sup>18</sup> Suasne aliz piaintine katsa pimamin, pi sura kunta.

## 13

### *Paas kalpa piras*

<sup>1</sup> Na pira iztuasmin, katsa kalpane piras numizta. Siete kizpukas diez pulkas wajazi. Sun wan pulkin watsal ipmu tit ijta. Wan kizpuruza Diosta kwail pit pararit. <sup>2</sup> An katsa kalpa pultam ishukana iztit iztau. Paiña mittine usu mittikanain iztit. Paiña pitne katsa ishu pitkanain iztit. Katsa aliz piaintine katsa kalpara paiña uzmu miltá, wantuza tinta ininnanapa. <sup>3</sup> Katsa kalpawa kizpukin aim kirit azi. Inapain azi. Aim kirit aizpa namtawane, wan suras awane iztaspaat kit katsa kalpara kanpaara, us pashimtu aizpa kiana. <sup>4</sup> Sun awane aliz piaintira wakpuj wainñarit. Katsa kalpara ininna chihkakane, awane katsa kalpara wakpuj wainñat

kit ka kaizara: “Mamazne an kalpakana wachi. Minminkas ussa annuppasachi.”

<sup>5</sup> Aliz piaintine ussa kiwainta, kwail pit paranpa, Diosta aliz pit paranpa. Ussa ininta cuarenta y paas mishkima, sun pit paranpa. <sup>6</sup> Sunkana kirit. Diosta aliz pit pararit. Ussa kwail pararit. Wan chiyura uztuzakas kwail paranarit. <sup>7</sup> Ussa ininta, Diosta piantuza waya kinpa, usparuza anuppananapa. Ussa ininta, wan sura uztuzakas, mamaz pit paramturuzakas, wan awaruzakas ininnanapa. <sup>8</sup> Wan an sura uzturuzne, uspa mun Pírikuwa pinkihta chiyura paritchiruzne, an katsa kalpara wakpuj wainñamiznazi. An Pírikune, piantatmikane, an pinkih miji. Au su sarachasmin, Diosne nijkulturuzpa mun chiyura pinkihta panarit, pailta payukima uzanapa.

<sup>9</sup> Mímtumikane an pit mirawa:

<sup>10</sup> “Minpazha mamaztuza kajchikin miltane,  
uspakas kajchira sipparinazi.  
Cuchillo kwizkasa pat kit piantaramikane  
kawarain inazi.”

Sunkana naizamtuasmin, une, Diosta pianturuzne wan naizmu tinta tailchat kit Diosta pailta payukima nijkularawa.

<sup>11</sup> An kwizpane nane mamaz katsa kalpa piltas nura iztau. Usne paas píriku pulkana wajazi. Parakane, usne aliz piaintikana azta. <sup>12</sup> An kwizpa katsa kalpane an ñancha katsa kalpakana ininnat kit us pashit aizpa kimizta. An kwiztamikane an sura uzturuza ininnara, an ñancha mikasha wakpuj wainñanapa. An ñancha kalpamikane aim kirit aizpa namtitmika azi. <sup>13</sup> Kwizpa kalpkas

anza katsa iztasparit kal kira. Usne wan awa iztakin chiyuras an pilkin ñ taizninnara.<sup>14</sup> Paiña katsa kal kimtu akwa, kwizpa kalpamikane an sukin uztuza pírail kaiznara, uskasa ianapa. Usne wan katsa kal an ñancha kalpa iztakin kirit. An sukin uztuza ñinnara, mamaz kalpa an ñancha kalpakanain saanapa. An ñancha kalpa cuchillo kwizkasa aim kirítkas, usne uzmizta.<sup>15</sup> An ñancha kalpane an kwizta kalpara ñinta, maza kalpa tıkasa sanapa. Awaruza an kalpa saritta wakpuj wainñapa ñinnara. Wakpuj wainñarakine, usne usparuza piantanara.<sup>16</sup> Sun katsa kalpane wan awaruza uspa numal chihtíkin chiwazha panapa ñinnara. Chihtíkin parakine, kinijkinkas chiwazha panapa ñinnara. Ainkiruzakas, katsaruzakas, kwazparuzakas, puizaruzakas, anpat mijchiruzakas, anpat mijtuzakas, chiwazha panapa ñinnara.<sup>17</sup> Chihtíkin chiwazha parit aizpa mijchiruzne, katsa kalpawa mun parit aizpa mijchiruzne, paiña número parit aizpa mijchiruzne, chinkas paisachi, chinkas paininsachi.

<sup>18</sup> An pit mintawa, wat piankamanapa. Piankamtamikane an katsa kalpawa número wintawa. Awane sun númerokasa muntit. Sun númerone seis cientos sesenta y seis mai.

## 14

### *144.000 awa kanta kaizamtu*

<sup>1</sup> Suasne mamasa iztau. Sión ızara iztuasmin, nane Pírikurakas, 144.000 awaruzakas iznarau. Uspane Pírikuwa munkas paiña Papihshpa munkas kinijkin wan panarit mijazi. <sup>2</sup> Suasne

nane maza chiyuras paramtu mirau. Usne katsa pi aztakanain azta. Ippa tinta aztakanain azta. Akkwan awa guitarra piantukanain tinta azta. Wan azta aizpa mirau. <sup>3</sup> Uspane Dios uzmukin masas kanta kaiz kiara. Ampara uztuz uzkinkas, ilaparuz uzkinkas, kanta kaiz kiara. Mazantuzmin masas kanta kamazi. Ciento cuarenta y cuatro mil awane, kanta kaiz kiara, Dios usparuza au sukin watsat milnara akwa. <sup>4</sup> Sun awaruzne sinam awa mai. Uspane mamaz patna ashampakasa pittarachi. Uspakas an Píriku imtura kanpaanazi. Diosne usparuza an ñancha painara, an sukin puraruzkasa chaizamanpa, Dioskasakas sun Pírikukasakas uzanapa. <sup>5</sup> Uspakas pírail kaizarachi. Sinam awa mai.

### *Kutña ángeltuz paraamtu*

<sup>6</sup> Suasne mamaz ángel chiyu paizkakin piltimtu iztau. Sun ángelne an sukin uztuza Dios watsal pit kainanashinai. Chiwaltuzakas, wan kwaltuzakas, wan pit paramtuzakas, kainanashinai. <sup>7</sup> Uspa ka tinta kaiznara: “Dios mit kit wakpuj waintain. Ussa ‘nune kwisha wari’ kiztai. Diosne chiyuras anpain, awaruza mimanana, uspa kwail piankamanapa. Chiyu saritmikashakas, an su saritmikashakas, wan pi saritmikashakas, wan pi kasu saritmikashakas wakpuj waintain,” ka kizta.

<sup>8</sup> Suasne mamaz ángelne ussa kwizpa at kit ka kaizta: “Katsa Babilonia pipulune wan azpiantit. Babilonia pipulukin uztaruzne akkwan tuntu kwail kiat kit wan awaruza kwail kin kawarin kamninnara,” ka kizta.

<sup>9-10</sup> Kwiztane mamaz ángelkas paas ángeltuza kanpaat kit tinta kaizta: “Diosne aliz kalpara

wakpuj waintaruzakas, kalpa aliz kalpakana saritta wakpuj waintaruzakas, aliz kalpawa marca kinijkin parittuzakas, aliz kalpawa marca chihtikin parittuzakas, tinta naizninnanazi. Diosne usparuza kwisha aliz kulnazi. Usparuza inta, asufre inkasa, innnanazi, kwisha naizanapa. Diospa ángelkas Pírikukas chiyuras usparuza iznanazi. <sup>11</sup> Uspa naizmukis ishne akkwan payukima puznazi. Pailmuchi. Aliz kalpara wakpuj wainturuzkas, kalpa aliz kalpakana saritta wakpuj wainturuzkas, aliz kalpawa munkasa parituzkas, payuwarakas amtawarakas naizanazi,” ka kizta.

<sup>12</sup> Diosta piantuzne, Dios pit mimituruzne, Jesús kaizta aizpa níjkultuzne, wan naizmu tinta tailchaanazi.

<sup>13</sup> Suasne nane maza chiyuras paramtu mirau. Nawa ka kaizta: “Sunkana pari: ‘Diosta piantuz iarike, uspane watsal kularinazi pailta payukima.’

Diospa Izpulkas ka kaiznamtu: ‘Watcha. Uspa tinta kal kiarit akwa, piña kwaizkulanz. Uspa kal kiarit akwa, Diosne chiyura usparuza chiwazha milananazi,’ ” ka kizta.

### *An sukin pakmu payu*

<sup>14</sup> Suasne mamasa iztau. Chiyura iztuasmin, nane putchã wanish iztau. Diospa painkulkanain wanish isalta uzta. Paiña kizpukin uru tit iptit. Usne kwiz azuelo plano chihtikin piztit. <sup>15</sup> Suasne mamaz ángelne Dios yaltas puz kit wanish isalta uzmikasha tinta ka kwianta: “Up kwiz azuelo plano tizpian kit pakti. Wan pippante kilpuin parit.

An sukin wan pippa pakpain parit.” <sup>16</sup> Wanish isalta uzmicane paiña kwiz azuelo plano an sukin kiakpinta, wan pippa kilpuin parit aizpa tizpian kit pakna.

<sup>17</sup> Mamaz ángelne kwiz azuelo plano mut kit chiyu yaltas puzta. <sup>18</sup> Mamaz ángelne chihtira ñin innappa mura. Diospa incienso paktam misharikis puztawane, usne kwiz azuelo plano mumikasha tinta parat kit kaizta: “Up kwiz azuelo planokasa tizpian kit pakti. An sukin wankail pippa kwas paktawa, wan wankail pippante wan ñin arit akwa.” <sup>19</sup> Sun ángelne paiña azuelo planora an sukin kiakpintit, wankail pippa kwas kalpiz kit paknapa. Wan kwas pak kit wan wantat kit nuzpizta, chap pi puznapa. Sun ángeltuz wankail pippara pakkat kit nuzpiztukana, Diosne kwail awaruza naizninnanazi, ianakima. <sup>20</sup> Pipulu mamal wankail pippara nuzpizta. Wankail pippa nuzpiztakin, aimpi pine pinnakta, caballo kizpukinkima, caballo tit kan kit ñininkinkima. An aimpi pine kutña cien kilómetroskima puzta.

## 15

### *Moiséspa kanta*

<sup>1</sup> Chiyura iztuasmin, nane chiyura mamaz katsa iztasparit kal iztau. Ñamin sunkana iztachish. Siete ángeltuza iznarau. Maza mazain minpa siete kwail kianapa ñinnarit. Wan kwail kirít aizpa pailkane, Diosne an sukin an kwail ñinmanazi.

<sup>2</sup> Suasne nane sinam katsa pikain iztit iztau. Sun pine ayukta kai iztau. Pi ayukta ñikanain iztau. Aliz kalpara anupparittuzne sun

sīnam pimakin uzara. Aliz kalpakana saritta wakpuj wainñarachi. Aliz kalpawa munkas, paña númerokas, uspa kinijkin panintachi. Diosne usparuza guitarra milanara, Diospa kanta kizanapa.<sup>3</sup> Uspane Moisés Diosta kiwainmumika kantakana, Pírikura kantakas kaiz kiat kit kizara:

“Nune wan kal kit aizpa kwisha watsal kirit.

Au Anpatne, au Diosne wan kal kishinai.

Nu wan kimtu aizpa kwisha wari.

Nune an sukin uzturuza īninnamti.

<sup>4</sup> Wan chiwal nua wakpuj wainñanazi.

Wan chiwal nua ‘kwisha wari’ kizanazi.

Nuin sīnammika i.

Wan suras awane nu uzkin aat kit wakpuj wainñanzi.

Awaruzne nu watsal nil kirit aizpa pianka-manazi.”

<sup>5</sup> Sun iztawane, kwiztane, nane chiyura wanmakmukin iztau. Sua Dios uzkin ayukta Dios pit pinkih parakin iztau. <sup>6</sup> Sun siete ángeltuzne chiyu wanmakmukis puzara, siete kwail ilnam kianapa. Uspane putchā kwaksham kwarit. Uru titkas pechokin ipparit. <sup>7</sup> Suasne maza kalpane ampara kalparas siete ángeltuza siete aiz uru waz milanara. Diosne, pailta payu uzmikane, ilmu uru wazta winta, au sukin uztuza ilnanapa. <sup>8</sup> Katsa Diosne chiyura wanmakmukin akkwan ishkasa napta. Sun urain mīnminkas chiyura wanmakmukin napsachimazi. Siete ángeltuz siete kwail ilnam pailtawane, awane chiyura wanmakmukin nappaashinai.

# 16

*Uru waztas ilnam puzanazi*

<sup>1</sup> Suasne nane maza chiyuras paramtumikasha mirau. Usne siete ángeltuza ka kaiznara: “Diosta iat kit siete ilnam wazta wintain, pilta paran-napa,” ka kiznara.

<sup>2</sup> An ñancha ángelne paiña ilnam waz pilta paranta. Ilnam waz parantawane, aliz kalpawa marcakasa parittuzkas, aliz kalpawa kalpakana saritta wakpuj wainturuzkas ña pítnakima kwisha ishtu paarit.

<sup>3</sup> An kwiztamikane paiña ilnam waz ñam pira paranta. Ñam pine kwanam aimpihana namta, awa piantarit aimpihana. Wan ñam pira chamtruzne iarit.

<sup>4</sup> An kwiztamikane paiña ilnam waz wan ainki pirakas, pil kulta pi puzmukinkas, paranta. An pine aimpihana namta. <sup>5</sup> Suasne nane ainki pi tañu kiritmikasha mirau. Sun ángelne ka kizta:

“Nu kimtu aizpa nil i. Nune ap sinam Dios i.

Nukas ma uztu. Nukas an ñancha uztu.

Nu ilnara aizpa watcha i.

<sup>6</sup> Sun ma payu naizmuruzne Diospa kwaltuzakas, Dios pit kainammturuzakas piantanarizi.  
Uspa kwail kiarit akwa, uspane naizashina, aimpi pi kwankima.”

<sup>7</sup> Mazane Diospa incienso paktam misharikis ka kaizta:

“Diosne wan chiwal kishinai. Anpat ilnara aizpa watcha i.

Usne wan nil kirit. Ñanta kitchi.”

<sup>8</sup> Suasne an kwiztamikane paiña ilnam waz pãnta paranta, wan awaruza ñikasa

impaktanapa. <sup>9</sup> Ìn impaktamturuzne kwisha naizara. Naizarakas, uspane Diospa kwail kizarit, Dios wan ilnam ininta akwa. Uspe kwail kiashit aizpa chihkaashitchi, Diosta kaiyanapa, “Dios kwisha wari” kizamanpa.

<sup>10</sup> An kwiztamikane paiña ilnam waz aliz kalpawa uzmura paranta. Tìlkwil parit, aliz kalpa inintukin. Suane wan awaruzne uspe yankwijara sula kuara, uspe ishtu akwa. <sup>11</sup> Chiyura Diosta kwail pit kizara, uspe ishamtu akwa, uspe ña pittain ishamtu akwa. Uspe kwail kal kiarit aizpa chihkaashitchi.

<sup>12</sup> An kwiztamikane paiña ilnam waz katsa Éufrates pira paranta. Parantawane, Éufrates pine chihktit, pán puzmumals mikwaruz kwakkanapa.

<sup>13</sup> Suasne nane katsa aliz piaintirakas, aliz kalparakas, pirail kaiztumikashakas iznarau. Uspe pitkis kutña kwail salizne, pumkanain iztit, puzara. <sup>14</sup> Sun Diablowa saliztuzne katsa iztasparit kal kiara, awa usparuza kanpaanapa. Uspakas wan suwara iat kit wan katsa mikwaruzakas uspe suldaruruzakas akwanara, sun payu Dioskasa, wan chiwal kal kimturuzkasa, tinta waya kianapa.

<sup>15-16</sup> Katsa mikwaruzne Armagedón inkal sura wanmakkara. Hebreowa pitta *Armagedón* munta. Cristo kaiuzu aizpa mirain. “Nane anpain ish. Maza walkumkanain kainarachin anash. Sun payu tìrizturuzne, uspe putchā pín watsamtuzne, watsal kulanazi, piltim chamanpa, paiña iztakin mitsal kiamanpa.” Putchā pínwa paramtukas, usne uspe kwail kiarit aizpa sinam samtu kaiznara.

<sup>17</sup> Suasne minpa ángelne paiña ilmu waz inkwara paranta. Parantawane, mazane chiyuras, Dios uzmuras, tinta ka kaipta: “Na kaipta aizpa, wan ilnara aizpa, wan paitire,” kizta. <sup>18</sup> Suasne ñ chiyuras taiztawane, ippa tinta azta. Tinta su ulmu azi. Awa an sukin uzasmin, an su ulmukana wachi azi. <sup>19</sup> Katsa Babilonia pipulukin kutña pajte istit uz kirít. Wan sukin pipuluruzne urumpukasa wan taizarit. Dios an katsa Babilonia pipulura uztuza aliz kulnat kit ilnanapa ñintia, kwisha naizanapa. <sup>20</sup> Wan ainki su pi paizkakin wan kaarit. Wan ñikal ñzakas saimanamtit, wan kaarit akwa. <sup>21</sup> Akkwan katsa hielo, ampara arroba uskanain, chiyuras taizara. Awaruza aim kiara. Hielo awaruza kwisha aim kiara akwa, sun awane Diosta aliz pit paraarit.

## 17

### *Diosne kwail ashampara ilnazi*

<sup>1</sup> Maza ángel siete ángeltuztas, ilnam waz mijmikane, nawa parat kit kaizish: “Nakasa at. Nane nua annash, an kwail ashampara yawakima ilkwarakas. Usne wan pi isalta uztu. <sup>2</sup> An sukin uzturuza mikwaruzne an ashampakasa uzat kit akkwan kwail kiarit. An ashampawa kwail kirít aizpa awaruza kwaktit akwa, an sukin uzturuzne kwail awa namat kit pirít awakana uzanazi,” kizta.

<sup>3</sup> Kwiztane Dios Izpul nawa kainkizpanintuas-min, maza ángelne nawa pul sura milzish. Tane nane ashampa kwanam aliz kalpara anuzta iztau. Akkwan kwail pit sun aliz kalpara parit, Diosta kwail pit paran. Siete kizpukas, diez pulkas waj.

<sup>4</sup> An ashampane tilchakta pīnkanakas kwanam pīnkas kwara. Akkwan uru in kwara. Akkwan watsal iztit ukne kwilkin kwara. Putchā inkas kwara. Uru wazkas paiña chihtikin mura. Waz ayukta paiña kwail kit aizpkas, mamaztuza wan kwail kwaktit aizpkas mura. <sup>5</sup> Paiña kinijkin maza pianchi mun ka parit:

BABILONIA KATSA I.  
SUN PIPULUNE AWAKANA I,  
KWAIL AWARUZA KAWIRARA AKWA,  
AWARUZA AKKWAN TUNTU KWAIL KWAKTIT  
AKWA.

<sup>6</sup> Suasne nane an pirit ashampara iztau, an ashampane Diosta piantuza piantanarit akwa. Usne Jesús pit kainammtuza piantanarit.

Na ussa izta akwa, nane ishkwatkwerau.

<sup>7</sup> Suasne ángelne nawa kaizish: “¿Chikisma ishkumtus? Nane nu izta aizpa kainanash, wan piankamanapa. Sun ashampane aliz kalpara anuzta. Kalpane siete kizpukas, diez pulkas waj.

<sup>8</sup> Sun aliz kalpane nu izta an ñamin uzta. Ma uztuchikas, mamaz payura paiña ainkih kultas nurinazi, mamasa uzna. Paiña kal pailtawane, usne ñinta irinazi, chiwal pailnakima. An aliz kalpara izarawane, an sukin uzturuzne, uspa mun chiyu pinkihta patchiruzne, ishkuarinazi. An su sarachasmin, Diosne pinkih sat kit ussa piantuzpa mun pinkihta para. Sun aliz kalpane an ñamin uzta. Ma uztuchikas, an imparane uztinazi.

<sup>9</sup> Sun pit miraruzne níjkulat kit na kaiantu aizpa piankamanazi. Sun ashampane aliz kalpara siete kizpu waj anuzta. Siete kizpune siete inkal izakanakas, siete katsa mikwaruzkanakas,

izarit. <sup>10</sup> Cinco katsa mikwaruzne wan kaarit me. Mazane cincoras ma ñintui. Minparane mama atchi. Minpara akane, akwan payuchiki-main nukkulnazi. <sup>11</sup> Sun aliz kalpane, an ñamin uztamikane, mane uzchi. Sun kalpane katsa mikwa namta. Uskasa ocho ñintuz wianta. Uskas pailtinazi.

<sup>12</sup> Sun diez pul nu izta aizpa diez mikwaruzkana izarit. Mama ñinnamtuchikas, uspane an aliz kalpakasa akwan payu chikimain ñinnanazi. <sup>13</sup> Sun diez mikwaruzne usparuzpain nijkulamtu, aliz kalpara kiwainnanapa, wanta ñinanapa. <sup>14</sup> Uspakas aliz kalpakasakas Pírikukasa waya kianazi. Sun Pírikune paiña akwanarittuzkasa, paiña narittuzkasa, ussa nijkulturuzkasa, usparuza anuppanarinazi. Usne mamaz mikwakin anza tinta i. Usne mamaz katsa anpatmikakin anza tinta tailcham.”

<sup>15</sup> Suasne ángelne nawa kaizish: “Nune kwail ashampara paiña uztukin pimakin izta. Sun pine awakanain iztit. Pailta suras awakas, pailta kwaltas awakas, pailta pipuluras awakas, pailta pit paramtuz awakas, purai. <sup>16</sup> Nune aliz kalpara diez pultakas izta. Uspane kwail cham ashampara aliz kularinazi. Wan us mij aizpa nakarinazi, piltim uznapa. Uspane paiña ña kuat kit ñita impakkarinazi. Sunkana uspane ussa kanintinazi. <sup>17</sup> Diosne diez pul ñintuza kawarain nijkulninnara, Dios pashit aizpa kianapa. Suasne uspane usparuzpain nijkulara, aliz kalpara kiwainñanapa, wanta ñinanapa, Dios kaizta aizpa pailnakima. <sup>18</sup> Nune an ashampara izta. Usne katsa pipulukana iztit, an sukin wan chiwal

mikwaruza ñinamtu akwa.”

## 18

### *Babilonia pipulu wan pailtit*

<sup>1</sup> Suasne kwiztane nane mamaz ángel chiyuras kihshtu iztau. Usne katsa ñinmikakana azi. Usne pān maltakanain aizta, wan su kai puranapa.

<sup>2</sup> Tinta kwiat kit ka kaizta:

“Katsa Babilonia pipulu paltaintit.

Mane salitzuzne sua uzarit.

Wan kwail izpulkas sua nukkularit.

Wan tuntu pikumkas chikuyukas ta uzarit.

<sup>3</sup> Wan suras awane pirítkana namarit,  
wan tuntu kwail kiarit akwa.

An sukin katsa mikwaruzne akkwan awakasa an  
kwail kiare.

An sukin painintuzne, kwazpa awa kularit,  
uspa kwazpa ashampakana uzashit akwa.”

<sup>4</sup> Suasne nane chiyuras paramtumikasha iztau.  
Nawa kaizish:

“Ap kwalta ka kuruntain. Sun katsa pipulukis  
puzarawa,  
an pipulukin uztuz kwail kiamtukanain kia-  
mañpa,  
an pipulukin uztuz naizamtukanain, naiza-  
mañpa.

<sup>5</sup> Uspa akkwan tuntu kwail kiarit akwa, Diosne  
chiyuras uspa kwail kiarit aizpa izta.

Diosne uspa kwail kiarit aizpa mainmanazi.”

<sup>6</sup> Suasne usne ángeltuza kaiznara:

“Mane usparuza ilnari. Yawa ilmu mamaz  
awaruza ilnarakanain kawarain an  
pipulura ilnari.

Uspa kwail kiarit akwa, usparuza pa pijikima  
sun kwail kinari.

Sun pipulu mamaztuza naiznninara akwa, an  
pipulura uztuzaanza naizninnari.

<sup>7</sup> Uspane uspa chiwazha kiashimtu aizpa kiat kit  
kwail kwazpa awakanain uzshiara.

Kawarain usparuza naizninnari.

Sun pipulu uztuzne ka minñara:

‘Aune an sukin ininmumikakana makpas.

Aune wan pashimtu aizpa mijmakpas.

Aune mizurainkas tayalsachimakpas.’

<sup>8</sup> Katmizna maza payurain wan ilmu usparuza  
taiznarinazi.

Sun payura iarinazi, tayalarinazi, yak  
kiarinazi.

An tinta Anpat Diosne usparuza mimananazi,  
uspa kwail kiarit aizpa piankamanapa.

Suasne usne usparuza impakninnanazi, wan  
pailnakima.”

<sup>9</sup> An sukin katsa manta kimtuzne, sun ashampakanain kirittuzne, kwail kwazpa awakanain  
uzararuzne, azarinazi. Sun pipulura impaktawane, awane ish panaktu izanazi. Sun akwa  
uspane tayalarinazi. <sup>10</sup> Sun awaruzne attishtas  
sun pipulura izat kit ishkuarinazi, pipulukin il-  
namiztu akwa. Uspane ka kaizanazi:

“An katsa Babilonia pipulune  
kwisha naiztinazi.”

Akkwan payu chinkima nukkulmanazi.”

<sup>11</sup> An sukin paininturuzne, an pipulu akwa,  
azat kit kwiananazi, minminkas uspa painim mij  
aizpa paimtuchi akwa. <sup>12</sup> Minminkas uspa uru  
mij aizpakas, pial mij aizpakas, muin uk mij

aizpakas, ainki putchā uk mij aizpakas, paimtuchime. Putchā pīn mij aizpakas, tilchaktakana pīn mij aizpakas, an watsal pīn mij aizpakas, kwanam pīn mij aizpakas, paimtuchime. Watsal ti piampakas, katsa sinam kihtit sulakas, wat tikas, paimtuchime. Naztam irukas, mamaz irukas, marmol ukkas, paimtuchime. <sup>13</sup> Mīnminkas canela ti ayakas, watsal piām kīhwilkas, incienso impaktakas, mirra pikas, olivos pikas, vinokas, olivos pihsphikas, chara pippa kīritkas, chara pippakas, paimtuchime. Mīnminkas wakarakas, pīrikukas, caballo carrokas, kiwain-tuzkas paimtuchime.

<sup>14</sup> Sun painintuzne an piplura ka kaizarinazi: “Nu wan mijat aizpakas, nu wan mīlshimtu aizpakas, wan karit. Mizurainkas chiwazha karit aizpa saimanazi.” <sup>15</sup> An piplukin uspa mij aizpa painintuzzne kwisha kwazpa kularit. Uspane piplura attishtain kun kiarinazi. Sun piplura uztuz naizamtuasmin, uspane azat kit tinta kwian kit kaizanazi:

<sup>16</sup> “An katsa piplune kwisha naiztinazi.

Usne watsal pīn kwarit ashampakana iztit. Tilchakta pīnkanakas, kwanam pīnkas kwarit.

Urukas ainki putchā ukkas, muin watsal iztit ukkas kwilkin kwarit.

<sup>17</sup> Akkwan kwazparuz masain wan pailti; wan kakihsharit.”

Katsa kanua puijmuruzkas, kanuawara chamtuzkas, kanuara kal kimtuzkas, piwara kal kimtuzkas, piplura attishtain kun kiarinazi.

<sup>18</sup> Piulu impakta ish iztawane, ka kwiannara:

“An pipulukinkas anza katsa pipulu wachi.”

19 Kwisha tayalamtu akwa, uspane pul pil uspa kizpura paran kit azat kit kaizara:

“An katsa pipulune kwisha naizarinazi.

Katsa kanua pira mijattuzne,

uspa kwazpa akwa, an kwazpa namarit.

Uspa kwazpa masain wan kakihscharit.

20 An pipulu kakihshtikas, chiyura uztuzne watsal kultain.

Diosta piantuzkas, Dios manta kittuzkas, Dios

pit kainammtuzkas, watsal kularain.

Diosne an pipulukin uztuza ilnara,

an pipulukin uztuz Diosta piantuza naiznin-narit akwa.”

21 Maza katsa ángelne katsa chara kimu uk mut kit katsa pira kiain kit kaizta:

“An katsa Babilonia pipulune karinazi.

An uk katsa pira kiaintakanain karinazi.

Mínminkas sun pipulura chinkas izamanazi.

22 Mínminkas an pipulu miwara guitarra pianamanazi.

Karaskwil usmuruzkas, iru kwil usmuruzkas, an pipulu miwara mamasa usamanazi.

An pipulukin kal kimtuzakas sayamanazi.

Kal wa chi akwa, an pipulukin chara kimu ukne mamasa azmanazi.

23 Mizurainkas an pipulukin impilutta aizamanazi.

Mizurainkas mínminkas an pipulukin kasara kimanaazi.

Painintuz katsa manta kimmikakana namaritkas, an pipulune wan karinazi.

Uspane wan suras awaruza pirail apnarit, nilchi pit paarit akwa.

<sup>24</sup> Diosne an pípulu uztuza ilninnanazi,  
 Dios pit paramtuzakas, Diosta piantuzakas,  
 wan suras uzararuzakas piantanarít  
 akwa.”

## 19

<sup>1</sup> Kwiztane nane akkwan awa chiyura tinta  
 paramtu minarau. Ka kaizara:

“Au Diosne kwisha wari.

Usne aumíza kwail sínam sammika i.

Us an tinta akwa, usne wanta ininnashinai.

<sup>2</sup> Usne wan awaruza wat mimanamtú, uspa  
 kwail piankamanapa. Mamaztuza ilnam-  
 tukas, us kímtu aizpa watcha i.

Usne an Babilonia pípulura uztuza naizninnara.

Uspane kwail ashampakana uzat kit wan  
 awaruza kwail uznapa kamtanara.

Mane Diosne usparuza naizninnarít, Diosta ki-  
 waintaruza piantanarít akwa.”

<sup>3</sup> Sun akkwan awane mamasa kaizara:

“Au Diosne kwisha wari.

An pípulu impakta ishne pailta payukima  
 nunazi.”

<sup>4</sup> Suasne veinticuatro ilaparuzkas, ampara uz-  
 tuzkas, Dios uzkin palsumat kit wakpuj wainñat  
 kit kaizara:

“Watcha Diosne kwisha wari,” kizara.

<sup>5</sup> Mazane Dios uztukin ka kaizta:

“Wan Dios kiwaintuzkas, ussa ishkumtuzkas, kat-  
 saruzkas, ainkiruzkas,  
 ‘Dios kwisha wari’ kaizarain.”

*Pírikuwa kasara kim pishta*

**6** Suasne nane akkwan awa paramtukanainkas, akkwan pi taizta aztukanainkas, akkwan ippa aztukanainkas, mīrau. Ka kaizara:

“Diosne kwisha wari.

Au Anpat Diosne īninnat kit us tīnta akwa  
us kishimtu aizpa kinazi.

**7** Us akwa, watsal kulmīzpai. ‘Diosne kwisha wari’  
kiztuasmin,  
watsal kulmīzpai,

Pirikuwa kasarakim pishta taizta akwa.

Pirikuwa ashampane usmin sīnam parit  
uskasa īn.

**8** Sun ashampane sīnam putchā pīn naztam iztit  
sap kit kwara.

Diosta piantuzne, wat kin uzturuzne, putchā  
pīnkanain kwaanazi.”

**9** Ángelne nawa kaizish: “Sunkana pari,  
‘Pirikuwa kasara kim pishtara akwattuzne watsal  
kulananzi.’ ” Ma pitchin kaizta: “Na kaiztu aizpa  
Dios watcha pit i.”

**10** Suasne nane ángelpa mittikin taiz kit wakpuj  
wainshirau. Usne nawa kaizish: “Sunkana  
kimun. Nakas Diospa kiwainmika ish. Nukas,  
nu aimpihshtuzkas, Diospa kiwainmuruz mai. U  
Dios pit kainanamturuzne paiña kiwaintuz mai.  
Diostain wakpuj waintawamakpas,” ka kizta.

### *Putchā caballora anuzmumika*

**11** Suasne mamaza iztau. Chiyura ayukta iztu-  
asmin, nane putchā caballora iztau. Caballora  
anuzmumikane Dios kaizta aizpa mīra. Watchain  
kaiz kit mamaztuza nil īninnara. Usparuzkasa

waya kinarakas, usne wat kiriit. <sup>12</sup> Paiña kasune īkanain naztam aizta. Akkwan tit wat-sal iptit kizpukin kwariit. Paiña mun kinijkin parit aizpa usmin pianazi. <sup>13</sup> Usne aimpi pustit pīn kwara. Paiña munne “Dios pit” munazi. <sup>14</sup> Chiyuras waya kimturuzne ussa kanpaat kit putchā caballoruza anuzara. Uspane kwisha wat-sal putchā pīn kwaara. <sup>15</sup> Maza kwiz mashtine paiña pittas puzta, an sura uztuza piantananapa. Usne irukasa an sura uzturuza tinta īninnanazi. An tinta Diosne, wan kishimtumikane, awaruza mitti kulnanazi, ilnanazi, Dios usparuza aliz kularit akwa. Kawarain usparuza naizninnanazi. <sup>16</sup> Paiña kwakshamtakas, paiña pantalóntakas ka parit:

SUN KATSA MIKWANE WAN īNINTUZA  
ĪNINNAMTU.

USMIN WANTUZA MANTA KINAMTU.

<sup>17</sup> Suasne maza ángel pān isalta kuntit iztau. Usne wan katsa wam chiyu kwashtara pilturuza tinta kwian kit ka kaiznara: “Arain. Diospa katsa pishtara wanmaktain, us kwintu aizpa kuanapa. <sup>18</sup> Usne katsa mikwaruzpa ñakas, ainki mikwaruzpa ñakas, tinta awaruzpa ñakas, caballowa ñakas, cabollora anuztuzpa ñakas, anpat mijchiruzpa ñakas, anpat mijtuzpa ñakas, pash-pawa ñakas, ilapawa ñakas kwinnanazi, kuanapa,” kiznara.

<sup>19</sup> Suasne nane sun aliz kalparakas, an sukin katsa mikwaruruzakas, uspa suldaruruzakas, iznarau. Uspane wanmakkara, cabollora anuztamikakasa waya kianapa, paiña suldaruruzkasa waya kianapa. <sup>20</sup> Waya kiarawane, mīnpazhane aliz kalparakas, pīrail kaizmumikashakas, pizat

kit kantit. An pirail kaizmumikane aliz kalpa iztakin masas iztasparit kal kirit. Paiña kal kirit akwa, usne aliz kalpawa izmu marca parittuza pirail kaiznarit, aliz kalpakana saritta wakpuj wainñapa. Uztuasmin, sun aliz kalpakas sun pirail kaizmumikakas pizat ñasufre aiztukin kiakpintit azi. <sup>21</sup> Caballora anuztumikane paiña pittas mashtikasa anparuza piantanara. Katsa pikum chiyu kwashta pilturuzne uspa ña tuknakima kuara.

## 20

### *Los mil años*

<sup>1</sup> Suasne chiyura iztuasmin, nane maza ángel chiyuras kihshtu iztau. Sunne paiña chihtikin ainkih kulpa llavekas katsa cadenakas miltá.

<sup>2</sup> Sun ángelne aliz piaintira, antikwa kamtara, ti pain kit piz kit maza mil añokimain cadena kuhtit. Antikwa kamtane “Satanáskas Diablocas” muntit.

<sup>3</sup> Usne antikwa kamtara ainkih kulta kiakpin kit pijta sip kit pijtakin palta, wan sura uztuza mil añokima kwail kimanpa. Mil años sipta paitlikane, antikwa kamtane akkwan payuchin chihtit anazi.

<sup>4</sup> Mama chiyura iztuasmin, nane akkwan inintuzpa uzmu iztau. Piantarittuzne, kizpu tit irittuzne, wan uzmukin uzara. Uspane iara, Dios pit kainara akwa, Jesúspa pinkihta panarit akwa, aliz kalpara wakpuj wainñarachi akwa, aliz kalpakana saritta wakpuj wainñarachi akwa, aliz kalpawa marca kinijkinkas chihtikinkas parachi akwa. Mamasa kakulakane, sun awaruzne Cristokasa maza mil añokima ininñanazi. <sup>5</sup> Suntuzne an ñamim mamasa kakultaruz mai. Mil

años pailtawane, anpa irittuzne mamasa kakul uzanazi. <sup>6</sup> An ñamin mamasa kakul uztaruzne Dioskasa uzat kit watsal kularinazi. Uspane mamasa iamanazi. Diospakas, Cristowakas pariya namanazi. Cristokasa mil añorakima ininnanazi.

### *Satanásne pailtinazi*

<sup>7</sup> Mil año pailtikane, Satanásne kajchiras chiktit anazi, <sup>8</sup> wan suras uztuza pirail kaiznanapa. Sun awaruzne “Gogkas Magogkas” mun mai. Puztawane, usne an suras uztuza wanmaknanazi, uspakasa waya kinpa. Pi ksu wiansachikanain sun awaruza wiansachi.

<sup>9</sup> Wan suras awaruzne Dios pashimtu pipulura nuat kit Diosta piantuza pilzawal kwianazi. Awa pipulura izparawane, Diosne chiyuras ñ ininnanazi, sun awaruza impaktananapa. <sup>10</sup> Diosne Diablora, awaruza pirail kaiztumikasha, ñ impaktukin kiakpiñnazi. Sua asufre aizmu. Sun impaktukin aliz kalpakas, kwail kaiztumikakas, uzpailnazi. Suane uspane payuwara amtawara chiwal pailta payukima naizpailnazi.

### *Wantuzne Diospa putchā uzmukin*

<sup>11</sup> Suasne nane katsa putchā uzmukin iztau. Dios paña putchā uzmukin uzasmin, an sukas an chiyukas wan kakihshtit, mizurainkas izamanpa. <sup>12</sup> Hapa irittuzkas pashpa irittuzkas mamasa kuhstawane, nane usparuza Diospa ñintukin iznarau. Suane parit pinkih azpiztit. Mamaz pinkihkas azpiztit. Diosta piantuzpa mun sun pinkihta parit azi. Uskasa uzanazi. Sun pinkih

iztawane, irittuzpa kal kiarit aizpa pinkihta iztawane, Diosne irittas kuhsninnat kit irittuza mimanat kit usparuza uspa kwail kiarit aizpa kainanara. <sup>13</sup> Katsa pi kwarit irittuzkas, wan chiwal an sukin irittuzkas, purazi. Diosne usparuzpa kal kiarit aizpa mimanat kit usparuza uspa kwail kiarit aizpa kainanara. <sup>14</sup> Minpara sun irittuzne īn impaktukin ianazi, kwisha naizarinpa. īn impaktamtuken kihshturuzne sunkanain attishta ianazi, Diosta izamanpa. <sup>15</sup> Paiña mun chiyu pinkihta paritchiruzne, Dioskasa uztachiruzne, īn impaktukin kiakpintit azi.

## 21

### *Masas chiyukas masas pilkas*

<sup>1</sup> Kwiztane, suasne nane masas chiyukas masas pilkas iztau. An ñancha sara chiyukas, an ñancha sara pilkas, an ñancha sara pikas pinkularit. <sup>2</sup> Dios pipulura, masas Jerusalén pipulura, chiyuras, Dios uztas kihshtimtu iztau. Ashampa paiña ampukas kasara kimtune, usne watsal pñ kwamtu. An chiyuras pipulune sun ashampakanain kwisha watsal iztit. <sup>3</sup> Nane Dios uzmukin tinta kwiantumikasha mirau. Ka kaitza: “Diosne awa purakin tuanazi. Awakasa uznazi. ‘An awane ap kwal i’ kiznazi. Diosne uspa Dios namnazi. <sup>4</sup> Suane Diosne wan tayalmu pailnintinazi. Suane minminkas an iasachi. Minminkas an tayalasachi. Minminkas an azasachi. Suane an ishtu wachi. Mane wan an ñancha naiznинmu pailtit,” ka kizta.

<sup>5</sup> Uzmukin uztumikane ka kaizta: “Wan antikwa píntit akwa, nane wan chiwal masas sashinash,” kizta. Mamasa nawa kwinta kikane, nawa ka kaizish: “Na kaiztu aizpa píñkihta pari. Na kaiztu aizpa watcha i. Katmizna sun watcha pit níjkultain,” kizta.

<sup>6</sup> Mamasa ka kaizish: “Na kaizta aizpa wan paitire. Wan sarachasmin, uztau. Wan paitikane, nane mama uznash. Nakasa wan masamtu. Nakas wan pailnintus. Nane kwazi kiltumikasha chiyuras kwazi kwinnash, paita payukima uznapa. Kain kwinnash.

<sup>7</sup> Anuppamtumikane na kin namtit aizpa piankam kit sapnazi. Nane paiña Dios namnash. Usne ap painkulkanain namnazi. <sup>8</sup> Na akwa ishkumturuzne, na kaizta aizpa níjkultuchiruzne, wan tuntu kwail kiríttuzne, mamazta piantarittuzne, ampu mamaz ashampakasa pittittuzne, ashampa mamazpa ampukasa pittittuzne, mamaztuza taňu ki kamturuzne, awakana sararuza wakpuj waintaruzne, wan chiwal pírail apmuruzne, asufre ĩn aiztukin, ĩn impaktukin wan chiwal ñanazi. Suane Diostas ñanazi. Uspane nakasa tuamanazi.”

### *Masas Jerusalén pipulu*

<sup>9</sup> Suasne maza ángelta, siete ángeltuztas iztau. Sun siete ángeltuzne minpa siete wazta ilnam wintit aizpa pilta kiakpinta. Nawa parat kit ka kaizish: “Nakasa at. Nane tua ashampa kasara kin namtitmikasha, Pirikuwa ashampara annash,” kizta. <sup>10</sup> Na kainkizpamtuaśmin, Diospa Izpulne nawa mira, katsa īnkal kwash izarakima.

Suane nawa sinam Jerusalén pipulu Diostas, chiyuras kihshtiimtu anzish. <sup>11</sup> An pipulune kwisha watsal aizta, Dios uztas arit akwa. Jaspe muin ukkanain naztam aizta. Kai iztit. <sup>12</sup> An pipulune katsa kalpialkas, kwash kalpialkas salpinwal kintit. Doce ángeluzne doce napmukin kunara. Doce Israel kwalpa mun, doce pijtakin parit. <sup>13</sup> Pán puzmura kalpial kutña pijta wa. Kalpial sur nilmalkas kutña pijta wa. Kalpial norte nilmalkas kutña pijta wa. Pán payapmura kalpial kutña pijta wa. <sup>14</sup> An pipulu kalpialne doce katsa ukkasa sarit. Doce Pirikuwa intintuzpa munne doce ukta parit.

<sup>15</sup> Nakasa paramtumikane, uru ti anizmu miltá, pipulurakas, pijtaruzakas pipulu kalpialtuzakas anizna. <sup>16</sup> An pipulune ampara kawarain kalpial kintit wa. Yawa aizkas, yawa akskas sun kalpial kawarain anizta. Ángelne paíña ti aizmukasa pipulura anizta. Paas mil kilómetros, paas ciento kilómitroskasa anizta. Yawa aizkas, yawa akskas, yawa kwashkas kawarain anizta. <sup>17</sup> Uskas kalpi-altakas anizta. Sesenta y cinco metros kwash aniztit. An ángelne ampuwa aizmukasa anizta.

<sup>18</sup> Salpinkintit kalpialne jaspe ukkasa sara. Pipulune sinam uru aiztukanain iztit. Maizakanain aizta. <sup>19</sup> Kalpial samtasmin, akkwan tuntu muin ukkasa sara. An ñancha kwanam ukne jaspe munta. Mamaz kwizta kai pijtam ukne safiro munta. Mamaz kwizta pijtam tilkaya ukne ágata munta. Mamaz kwizta pijtam ukne esmeralda munta. <sup>20</sup> Mamaz kwizta putchawazha ukne ónica munta. Mamaz kwizta kwanam ukne cornalina muntit. Mamaz kwizta naram

ukne crisólito munta. Mamaz kwizta pijtam ukne berilo munta. Mamaz kwizta naram ukne topacio munta. Mamaz kwizta pijtamwazha ukne crisoprasa munta. Mamaz kwizta kai pijtam ukne jacinto munta. Minpa tilkayawazha ukne amatista munta. <sup>21</sup> Doce pijtane putchā ukkanain izarit. Maza maza pijtane putchā ukkasa sara. Pipulu mine urukasa sara. Pipulu mine maizakana aizta.

<sup>22</sup> Sun chiyukin iglesia wachi, au Anpatne sua uztu akwa. Au Diosne, chiwazha kishimtumikane, Pírikukasa wan pipulukin uztu. Awane wan chiyukin Diosta wakpuj wainñamtu. <sup>23</sup> Sun pipulukinne pānkas, palapchakas aiznapa pashimtuchi, Dioskas Pírikukas kai pānkanain aiztu akwa. <sup>24</sup> Wan sura uzturuzne an pipuluwara chaanazi, sua kai aiztu akwa. Wan katsa īintuzne chiwazha pial mij aizpa muat kit sua chihkat kit “Dios kwisha wari” kizanazi. <sup>25</sup> An pipulukinne payuwara pijta sīpmamanazi. Sua amta wa chi. <sup>26</sup> Wan sura uztuzne chiwazha pial mij aizpakas, chiwazha watsal iztit mij aizpa muat kit sua chihkanazi. <sup>27</sup> Chiwazha kwailne an pipulura nappamanazi. Chiwazha kwail kiamtuzkas, pírail paramtuzkas, mizurainkas sua nappamanazi. Uspa mun chiyu pinkihta parit mijtuzmin chiyura nappat kit uzashina.

## 22

<sup>1</sup> Sun ángelne nawa maza sinam pi anzish. Sun pine Dios uzmukiskas, Píriku uzmukiskas puztu. Sun naztam pine awaruza uzninnamtu. <sup>2</sup> Pipulu paizkakin kwisha katsa mi tu. Mi paizkakin

katsa pi wa. Pimamin akkwan tine kunkularit, awaruza uzninnanapa. Mish aizpa sun tiruzne pippa waamtu. Maza añorain doce pijikima waamtu. Ti kihkasa pih samtu, wan sura uzturuza wat paanapa.<sup>3</sup> Sua chinkas kwail wanmalsachi. Dioskas Pirikukas sua uzpailnazi. Paiña kiwaintuzne ussa kiwainanazi.<sup>4</sup> Uspane paiña matsih izanazi. Usne paiña mun uspa kinijkin parananazi.<sup>5</sup> Suane amta wachi. Impilkas pānkas wenamtuchi, Anpat Dios sua wanta kai aizninanatu akwa. Suntuzne wan payukima ininanazi.

### *Jesucristo anpain i*

<sup>6</sup> Ángelne nawa ka kaizzish: “Na kaiztu aizpa watcha i, u nijkulanapa. Anpat Diosne paiña ángelta ininta, Dios pit kainammtuza parananapa, paiña kiwaintuz chiwazha kirímtu aizpa piancamana.”

<sup>7</sup> Cristone ka kaizta:

“Nane anpain ish. An ñancha pit kaiztu aizpa mimituruzne, an pit pinkihta parit aizpa mimituruzne, watsal kularinazi.”

<sup>8</sup> Nane Juan mun ish. An pinkihta parit aizpa wan iz kit mīrau. Wan iztawane, wan mīrawane, nane ángel mittikin palsum kit ussa wakpuj waintau.<sup>9</sup> Suasne nawa ka kaizzish: “Sunkana kimun. Nakas nukanain Dios kiwainmumika ish. Up añaruzkas, Dios pit an ñancha kainnamturuzkas, an pinkihta parit aizpa mimituruzkas, Dios kiwainmuruz mai. Diostain wakpuj wain kit paikwatpamakpas,” ka kizzish.

<sup>10</sup> Mamasa kaizzish: “An pit pinkihta parit aizpa, an pit ñancha kaiztit aizpa puntit mijmun.

Wan an pinkihta parit aizpa masanapain. <sup>11</sup> Kwail kimituzne mama kwail kiarinazi. Sinam chiruzne, kwail mintuzne, mama kwail kishiarinazi. Wat kishimturuzne mama wat kishiarinazi. Diosta mishimturuzne mama Diosta nijkularinazi,” kizzish.

<sup>12</sup> Mamasa Cristone ka kaizzish:

“Mamasa azain anash. Na amtu payura kwail kimturuzakas wat kimturuzakas uspa kiarit akwa chiwazha milananash. <sup>13</sup> Namin uztau. Minpa payukima uznash. Nane an nanchamika ish. Nakas minpamika ish. Nane wan masamtus. Nakas wan pailnintus.

<sup>14</sup> Uspe kwail kiarit aizpa sinam kultittuzne watsal kulanazi. Uspane putchā pīn pattitkana sinam namanazi. Uspane sun pipulura nappat kit uzanazi, an pipulu ti pippa waritta kuanapa. <sup>15</sup> Kwisha kwail kimituzkas, tañu kimturuzkas, mamazpa ampukasa pitturuzkas, mamazpa ashampakasa pitturuzkas, mamazta pi antamturuzkas, awakana saritta wakpuj wainmuruzkas, wan pirail kaizmuruzkas, an pipulu pianamarain nukkularinazi.

<sup>16</sup> Nane Jesús mun ish. Ap ángelta wan nijkulturua ininnara, na kaiztit aizpa piankamanapa. Katsa mikwa Davidne ap pampa i. Katsa kimane palapcha kwiztain cham. Nane katsa kima aiztukanain ish,” kizta.

<sup>17</sup> Dios Sinam Izpulkas, Pirikuwa ashampakas “Arain” kiznara. An pit mimturuzakas “Arain” kiznara. Kwazi kilturuzne atpa, an kwazi kuanapa, Dioskasa uzanapa. Kain kwintu.

<sup>18</sup> Nane Dios an pit pinkihta parit aizpa mimturuza kurunanash. Watsal nijkul kit iztain. Minpazha chiwazha an Dios pinkihta wiantane, Diosne suntuza an pinkihta kwail parit aizpa taizninnanazi. <sup>19</sup> Diosne Cristora nijkulturuzpa mun chiyu pinkihta parit. Minpazha chiwazha an Dios pinkihta parit aizpa ukkarane, Diosne paña mun pinkihtas kwiznazi, Diospa pipulura uzmanpa.

<sup>20</sup> Sun pit kaiztumikane wanta kainanamtu: “Mamin anash.”

Sunkana kinazi. “Anpat Jesús, nu anka.”

<sup>21</sup> Nane Diosta paikumtus, Jesucristo uruza ki-wainanapa.

Paiti.

## **Masas Pit Jesucristowa New Testament in Awa-Cuaiquer**

copyright © 2002 Wycliffe Bible Translators, Inc.

Language: Awa-Cuaiquer

Translation by: Wycliffe Bible Translators, Inc.

### **Copyright Information**

© 2002, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Awa-Cuaiquer

**© 2002, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

## lx

PDF generated using Haiola and XeLaTeX on 11 Nov 2022 from source files  
dated 29 Jan 2022  
541a20ee-1de1-55f8-8b77-cbcd160a1567